

Meje Po Carte Cotacaya Pablo Tatina, Corinto Tomarapiwi Tatinatsi

*Meje poxona Pablo tamropata pitaba xua
tatina pomonaetha pomona Corinto tomarapiwi*

¹ Xan Pablon pacata tinatsi. Nacom peichichipaexae bapon necana exana xua Jesucristo pia peitorobi jiwi jiwana tatsin. Xan iru Timoteo pon pejume cowantsin baponbe panbe pacata tinatsi. Paxam pomona iru painya nejume cowantsixae Jesucristo pana nacaetutame penacaetutsi botha Corinto tomaratha xua wuna painya nejainchinexa Nacom. Matautano pata tinanbe pomona iru Nacom piamona tatsi xua Acaya nacuatha jinompa. ² Barabu Nacom pon Waxa iru Jesucristo pon jiwi Pecanamataxeinaein baponbe paca yawenaena pia paca nacaantobexae. Matautano barabu baponbe paca cana exanaena xua juntea painya nejinompaewa tsane.

Meje yabara xua poxona Pablo atene exanatsi

³ Bara Nacom wuna jaintatsi pon Wanacanamataxeinaein Paxa tatsi xua Jesucristo Paxa tatsi. Bapon Nacom Waxa naca yabara nanta xeina xua wanaca yawenaewa tsane. Bapon Nacom naca itanuwe matateica wanaca antobexae. ⁴ Daxita xua xuan ichamonae pana atene exana, xuan Nacom pana cui matateiqueiba, baxua Nacom

painta exana xua xuya iru ichamonae pata cui matateicaenexa tsaibi tsane pomonae poxonaе atene exaneibatsi ichamonae. Paxan ichamonae pacui matateican icha Nacom pana ichi xua pana cui matateica. ⁵ Icha Cristo ichichi poxonaе atene exanatsi ichamonae, barichi ichamonae pana atene exana pata jume cowuntsixae Jesucristo. Nacom, Cristo cui matateicatsi poxonaе atene exanatsi ichamonae. Bara pana ichi Nacom pana cui matateiqueiba poxonaе ichamonae pana atene exaneiba. ⁶ Ichamonae pana anthututane exana. Bequein baxua painta exana, daichitha awiya pana itacupa xua tapaca cayawenaewatsi poxonaе paca cui matateicatsi. Matautano pana atene exana pata paca cuidubixaetsi painya nepaca capanenebiyaenexa abe painya neexanae cuiru coyenein weya. Nacom pana cui matateica xua paxan xuya pata paca cui matateicaenexatsi. Baxua paca cana exanatsi poxonaе awiya junteма pajinompa dubenanaebiyame bequein poxonaе ichamonae paca atene exana icha barapomonae pana ichi xua pana atene exana. ⁷ Paxan ajuntusya paca cui yabara jume cowuntsiya ewatatsi xua paxam bara beta pajinompa dubenanaebiyaename poxonaе bequein ichamonae paca atene exana. Paxan payaputan xua paxam iruru paajuntucoyenetanem poxonaе ichamonae pana atene exana. Barichi Nacom paca cui matateica icha pana ichi xua pana necui matateica.

⁸ Tamonae pam, paxam pomonae iru painya nejume cowuntsiwixae Jesucristo. Paichichipan xua painya neyaputaewa xua ichamonae

bichocono painta ayapube exana Asia nacuatha. Baxua bichocono ayapusya pana juntu coyene jujuta, beya poxona awatha muxu jopa juntea pata dubenanaebiyaewa. Ichacuiha pananta xeineiban xua jopa pana itacupaeyo xua pata panenebiwa xua pata aswa tsane. ⁹ Ichacuiha pananta xeiñan xua bara metha pata werapaewa tsane. Ichitha baxua Nacom saya bara copata xua pata yabara jume cowantsiwa tsane xua meisa Nacom bara compa pia coutha pata taneyawenaewa tsane xua jopa pata tana nayawenaewa tsane pata coutha. Nacom apara pon equeicha asu exana pewerapaewi petapae cuiru coyene weya. ¹⁰⁻¹¹ Nacom pana necapanenebiya ichamona weya poxona barapomona bichocono abe painta exana poxona awatha muxu pata werapae. Matautano awiya Nacom baxua painta exanapona. Yatsicaewa Nacom payabara jume cowantan xua bexa tsane pana necapanenebiyaenano icha awiya painta wacaponame Nacomtha. Nacom pana neyawena poxona pinmonae painta tsipaebina Nacomtha. Bexa poxona Nacom pana necapanenebiyaena barapoxona pin bicheitomona jei tsane: “Nacom maisa pajuntu coyene weiweinan xua neyawenaewa Pablobaru xua jopa pewerapaewa neantobexae poxona jiwi pin bicheito cawuca barapomona nexa”, jei tsane barapo pin bicheitomona.

*Meje poxona Pablo jopa yapu jupaetsi xua pe-
ponaewa Corinto tomara beya*

¹² Pajuntũ coyene weiweinan, daxota atsaquiya pata jeiwa pocotsiwe: Daxita pocotsiwa paexanan po cae pin nacuathe, xuano poxonaē pata paca barũ jinompaewatsi, pata jũntũ coyene bara pana tsipaeba xua pinae bara beta paexanan. Pajuntũ coyene xanepanan Nacomtha. Matautano bara xainyeya paexanan daxita coyenein. Nacom pana neyawena xua beta pata jinompaewa tsane pata antobexae Nacom. Apra baxua jopa paexanaeyino barompaya pata tayaputae coyenewatha. ¹³ Daxita xua pacata tinatsi jopa icha diwesi pacata yawa muxuna tinaetsi. Pocotsiwa pacata tinatsi saya pocotsiwa painya nepaca itacũpaewa xua painya neyorobiwa tsane xuano xua painya nejume copi yaputaewa tsane. Ichichipan xua betiya painya neyaputaewa tsane daxita pocotsiwa xua pacata tinatsi. ¹⁴ Anoxuae daxita pam be conotha pana neyaputaneme. Poxonaē Jesús pon Wanacanamataxeinaein equeicha patopaetsica, pana neyabara jũntũ coyene weiweinaename icha paichin tsane xua paca yabara jũntũ coyene weiweinaeinchi.

¹⁵ Poxoru pana neyabara jũntũ coyene weiweiname daxota nanta xeinan xua tapaca siwa ponaewatsi tsainchi. Bapoxonaē icha neitacũpa equeicha bexa paca siwa ponaeinchi xua daxota ainya cuiyobetha paca siwa ponaeinchi tapaca cayawenaewa tsainchi. ¹⁶ Bayatha paca tsipaebatsi janje xuaje: “Poxonaē ponaein Macedonia nacua beya copiya ichichipan xua matha tsiwanaeya tapaca siwa ponaewatsi tsainchi. Equeicha paca taeinchi poxonaē caewa denan tsane Macedonia nacua

werena. Bapoxonae paca itacupa xua tapanayawenaewam poxonae warapaein Judea nacua beya”, paca jeichi. ¹⁷ Bequein baxua paeban, daichitha baxua jopa neitacupaeyo xua taexanaewa baxua. Poxonae baraxua paeban pana nejume cayabara cananta xeiname xua xan apara pon ichawa beya tapaebin xua be pocotsi jiton pon saya exana pocotsiwa bapon ichichipa xua ichawa beya ba paeba. Xan baxua jopa exanaeinyo. Jopa ba paca jeichi “Aja”, jopa paca jeichi. Ichacuitha jopa ba paca jeichi “Jume”, jopa paca jeichi xua poxonae cae coyene yabara paca tsipaebatsi. ¹⁸ Nacom bapon bara xaniwaicha tana neyabara paebin pocotsiwa taexanaewa. Bapon Nacom netane xua jopa ichawa beya tapaebiwa. Saya poxonae, ba “aja”, pejeinexa, ba “aja”, jan. Matautano saya poxonae ba “jume” pejeinexa, ba “jume”, jan. ¹⁹ Timoteo iru Silvano iru xan paca cuidubatsi Nacom Pejume Diwesi po coyene xua Cristo Jesús yabara, pon Nacom Pexanto tatsi. Bapon Cristo jopa bapana jei tsaibiyo bara caetotha: “Jume”, yawa “Aja”, jopa bapana jei tsaibiyo. Saya jame ba jei: “Aja”, ba jei tsaibi. ²⁰ Cristo bara daxita exana pocotsiwa Nacom Pexanto yabara tsiwuna muxu duta. Bara Cristo “Je” jei xua peexanaenexa pocotsiwa Paxa itorobatsi. Daxota waxainchi barichichi jei tsaibichi: “Je, barichi tsane bara Cristo Jesús exanaena baxua”, jei tsaibichi waxainchi poxonae Nacom wuna jainteibatsi. ²¹ Bapon Nacom pana ajantacoyenesu exana xua beta pata jume cowantsinexa Cristo. Matautano iru bara paca ichi Nacom, paca yawena. Bapon

Nacom naca itapeta watanacuichinexa bapon.
²² Barapon Nacom naca cana exana xua wanaca
 baru jinompaewa pia Pejumoŋe tunaxu tatsi
 wanaca yaputaenexa xua piamonae jiwichi.
 Baraxua Nacom naca tsita itapeinya xeina xua
 bexa tsane naca catsina ichawan.

²³ Nacom neyabara juntu coyene yaputane
 xua xainyeya paeban. Bequein juntucuru
 nanta xeinan xua paca siwa ponaeinchi ichitha
 jopa ponaeyino. Jopa paca siwa ponaetsi
 Corinto tomaratha tsipei jopa daunweya
 bepaca tsipaebichi xua paca juntu coyene
 wecoyeyi exanaetsipatsi. ²⁴ Jopa bepaca yabara
 itorobichi xua pocotsiwa bewa painya nejume
 cowuntsiwa tsane. Tsipei barapara ayapusya
 pajume cowunta dubenanaebiyame. Pocotsiwa
 jame paichichipan apara xua pata paca baru
 nacuichiwatsi jame, painya nejuntu coyene
 weiweinaenexa.

2

¹ Daxota juntucuru nanta xeinan xua jopa
 equeicha tapaca siwa ponaewa tsainchi, tsipei
 jopa bepaca wecoyeyi exanaetsi. ² Icha paca
 juntu wecoyeyi exanaetsipatsi, dapomonae aibi
 tsipae pomonae nejuntu coyene weiweina ex-
 ana. Jame meisa paxam paca itacupa xua tapana
 nejuntu coyene weiweina exanaewam. Ichitha
 icha paxam saya pajuntu coyene wecoyam tsi-
 pae jopa pana nejuntu coyene weiweina ex-
 anaemtsipae. ³ Daxota bayatha pacata tinatsi
 icha carta tsipei jopa bepaca siwa ponaetsi icha

saya paca jũntũ coyene wecoyei exanatsi poxonaē yabara paca muxuwetatsi pocotsiwa paexaname xua abe paexaname. Apra jame paxam pomonaē bewa pana nejũntũ coyene weiweina exanaem. Xan nanta xeinan icha jũntũ coyene weiweinan paxam bara paichim tsane pajũntũ coyene weiweinaename. ⁴ Poxonaē bayatha po carta pacata tinatsi bichocono unthathũ wecoyan, tsipei bichocono paca yabara najũntũ coyene eena exanatsi pocotsiwa painya neexanaexae beya poxonaē yatsicaewa wecoyan xua yatsicaewa taitacuere mene jujuincaewa. Jopa ichipaeinyo xua tapaca wecoyei exanaewatsi. Jame ichichipan xua painya neyaputaewa xua tapaca caantobewichi bichocono.

Meje poxonaē Pablo itoroba xua Corinto tomarapiwi peyabara jũntemainawa tsane pocotsiwa exana pon penowa pita

⁵ Caein pon paxam jiwana pam abe exana ichamonaetha. Bapon jũntũ coyene wecoyei exana ichamonaetha. Bapon jopa meisa apra compa nejũntũ coyene wecoyei exanaeyo. Barichi bapon bara irũ paca jũntũ coyene wecoyei exana daxita paxam bequein saya bapon abe exana pon painyamonae jiwana jiton. ⁶ Pon yabara icha cartatha pacata tinatsi pon abe peexanaein, peburũya nanta jũpaya paitawetame bapon xua pepatopaeyainwa painya nenacaetutsiwatha poxonaē wũnae pajaintame Nacom. Anoxuae bapon nacui baraxuba xua abe peexanaewa. Baraxua bara wũnae. Painya xoba equeicha paitawetame bapon. ⁷ Anoxuae paxam bewa

pacui yabara j̃ntemainaem abe pia peexanae cuiru coyene tatsi. Matautano bewa pacui matateicaename xua peaurayainwa. Icha jopa baxua paexanaemtsipae, bapoxonae bapon metha jopa juniya bichocono j̃nt̃u coyene wecoyei tsipae, xua daxota anaya pia coutha penacabetsiwa xua pebaraxubixae xua pejume cow̃ntsiwa. ⁸ Daxota paca tsipaebatsi, bapon patsita itapeinya xeinare xua peantobe coyenewa painya netsita xeinaewa bapon. ⁹ Bayatha yabara pacata tinatsi xua bewa pamuxuwetsim bapon. Paca j̃nt̃u coyene j̃j̃utatsi xua tayaputaenexa icha metha bara xaniwaicha pana nejume cow̃ntame daxita pocotsiwa paca itorobatsi, bara bayatha pamuxuwetame bapon. ¹⁰ Icha paxam ich̃n pacui yabara j̃ntemainame abe pia peexanae cuiru coyenein tatsi, barichin tsane ir̃u bapon cui yabara j̃ntemainaein abe pia peexanae cuiru coyenein tatsi. Tsipei icha ich̃n cui yabara j̃ntemainan abe pia peexanae cuiru coyenein apara poxoru copiya painya necui yabara j̃ntemainaexae abe pia peexanae cuiru coyenein tatsi. Baxua exanan Cristo tana neitorobixae. Baxua Cristo necui tane xua exanan. ¹¹ Waxainchi ichamonae abe pia peexanae cuiru coyenein tatsi yabara j̃ntemainatsi xua caurimonae pia pentacaponaein tatsi jopa wanaca cui amanayabinexa. Cui yaputainchi xua bapon bichocono daunweya jiwi j̃nt̃u coyene j̃j̃utatsi xua abe peexanaenexa.

Meje poxonae Pablo Tito bichocono yabara naj̃nt̃u coyene exabatsi Troas tomaratha

¹² Poxonae Troas tomaratha patopan xua tacue-icueijeinexa Cristo pejume diwesi bara inta yapu wɛnae xua tanacuichinexa Nacom nexa, pon jiwi Pecanamataxeinaein poxoru barapo tomarapiwi bara beta nejume tane. ¹³ Ichitha bichocono jopa jɛntema poponaeinyo poxoru bichocono yabara najɛntɛ exaban Tito pon irɛ pejume cowɛntsin Je-sucristo, yaitama jopa caxinaeinyo bapon. Daxota Troas tomarapiwi napeyaban. Bapoxonae ponan Macedonia nacua beya.

Meje yabara po coyeneya xua Cristo naca yawena xua waamanayabinexa caurimonae pia pentacaponaein tatsi

¹⁴ Nacom patsipaeiban, pajan: “Nacom maisa pajɛntɛ coyene weiweinan xua painta exaname”, pajan. Nacom pana cana exana xua Cristo betiya pana canamataxeina poxonae Nacom Pejume Diwesi pacueicueijan. Mataɛtano Nacom pana cana exana xua pata amanayabiwa caurimonae pia pentacaponaein tatsi poxonae jiwi yaputane pacana exanan xua peyabara yaputaewatsi Cristo. Daxita nacuantha ichaxota paponeiban, bapon payabara paebeiban. Barapo pexeinya jume diwesi xua papaebeiban tajɛ beya pajume pichipaponan, icha be poxonae petuxuei tuxusi ichi xua tajɛ tuxusi pona. ¹⁵ Nacom ichipa nawita poxonae beta patacueicueijan xua Cristo payabara cueicueijan icha be poxonae ichi poxonae bichocono tuxusi ichichipa incienso tuxusi matawɛn. Barichi po diwesi xua Cristo payabara cueicueijan, tajɛ pajume pichipaponan pomonaetha pomonae Cristo capanenebiya

ducuanaebiya xuano pomonaetha pomonae weraweracapona jopa pejume cowantsixae Cristo. ¹⁶ Poxonae jiwi jopa jume cowantsiyo barapo diwesi po diwesi pacueicueijan be tsita tuxusichi xua po tuxusi tuxusi barapomonae tupa peexanaewatsi. Ichitha poxonae jiwi jume cowanta, bapoxonae barapo diwesi tsita muxu wanaetsi icha xua jiwi ichi poxonae po tuxusi tuxune bichocono ponxo tuxusi wanaetsi. Barapomonae pejanta coyenetha yaputane xua barapo jume diwesixae Nacom cata barapomonaetha peajantayapuswa po peajantayapuswa ataya tsiteca. Jintam metha itacupatsi xua barapo Nacom pia petanacuichiwa tatsi peexanaewa xua pia coutha compa exana? Apra dapon ajibi. ¹⁷ Paxan jopa paexanaeinyo icha be jopa ichamonae ichiyo xua poxonae barapomonae pia paratixichi paeba dubenanaebiya Nacom Pejume Diwesi. Paxan po pebiwi pan xua xaniwaicha pata tsipaebi jiwi pan ichamonaetha, Nacom pata taneitorobixae. Daxota Nacom Pejume Diwesi papaeban caemonae wanaexanaexaetsi Cristotha.

3

Meje poxonae Pablo yabara paeba Nacom pia pena petsiwnae muxu dutsiwa tatsi

¹ Poxonae baxua pacata tinatsi, metha pana neyabara nanta xeinaetsipame xua paxan pomonae ainya cui jiwi pata naexanae jiwi pan. Nama ichamonae cartan capona po cartantha piamonae beta yabara tina barapomonae, xua painya necopatsiwa tsane xua bara pia

paca tsipaebeibichi Nacom Pejume Diwesi poxonae barapomonae pateibina painya tomaratha. Metha paxam pana neyabara nanta xeinaetsipame xua xan iru barichindu icha ichamonae ichi xua poxonae barapo carta capona pia xua painya necopatsiwa tsane xua bara pia paca tsipaebeibichi Nacom Pejume Diwesi. Bequein metha pana neyabara nanta xeinaetsipame xua xuya painta tinaetsipame xua paxan yabara ichitha jopa apara paca wucaetsi baxua. ² Poxonae daxita jiwi paca cui tane xua beta painya jinompaewa Nacom nexa, bapoxonae jiwi pana neyabara nanta xeina xua bara beta pata exanaewa xua pata paca yawenaexaetsi xua painya nejume cowantsiwa. Pata juntu coyenewan pana tsipaeba xua bara pinae pajume cowantame Cristo. Poxonae jiwi paca cui tane xua beta painya nejinompaewa Nacom nexa, barapo jiwi pana nejuntanaina xua beta pata paca cayawenaexaetsi. Baxua be poxonae jiwi yoroba pexeinya carta xua paxan yabara xua daxota jopa nantawenonaeyo xua xuya painta petinaenexa carta. ³ Cristo ichichipa xua jiwi tane xua bapon bichocono wuna exana paxam nexa po jumein weya xua paxan paca tsipaebatsi. Ichitha bapon Cristo jopa tinaeyo carta peanaincuitontha xua jiwi petaenexa pejumein itaneton. Matautano jopa tinaeyo peitaneton xua ibo panawatha ichi Moisés ichi. Jame Nacom pia Pejumope tunaxu tatsi icha juntu coyene paca cata xua daxota jiwi tsita itapeinya xeinatsi xua Cristo beta exana paxam nexa.

⁴ Paxan pana itacupa xua baxua papaeban

Cristo pata neyawenaexae xua pata jume cowantsiwa Nacom. ⁵ Ichitha jopa pana neitacupaeyo xua pata coutha pata exanaewa baxua. Daxita pocotsiwan pana itacupa xua pata exanaewa apara Nacom pata taneyawenaexae. ⁶ Nacom pana necana exana xua pomonae yatsicaewa pata yabara cueicueijei jiwi pan Nacom pia pena petsiwnae muxu dutsiwa coyenewa. Nacom pia pena petsiwnae muxu dutsi coyenewa jiwitha jopa xeinaeyo xua tina ainya coyenein xua jiwi peitorobi coyenewatsi xua jiwi bewa exanaena. Barapo Nacom pia pena petsiwnae muxu dutsi coyenewa paeba xua saya meisa xua beta pejinompaenexa. Nacom pia Pejumope tñaxñ tatsi itacupatsi xua naca cata pena pejñntñ coyenein. Nama Moisés pia peitorobi coyenewa seicaya paeba xua bequein jiwi exana xua Moisés itoroba, barapomonae awiya werapaena abe peexanaexae. Nama seicaya Nacom pia Pejumope tñaxñ tatsi peajñntñyapusñwa naca cata.

⁷ Moisés pia peitorobi coyenewa ibo panawantha tina. Barapo coyene jiwi cana exanatsi xua pewerapaewa abe peexanaexae. Poxonae barapo coyenewa Moisés cata israelmonaetha barapomonae israelmonae jopa itacupaetsi xua Moisés peitabara taewatsi tsipei Nacom pia pexeinya peitupanae coicha tatsi bichocono pentha Moisés peitabaratha. Ichitha barapo Nacom pia pexeinya peitupanae coicha tatsi Moisés pia xainya weya tatsi bewayo caewanaya. ⁸ Po pena jñntñ coyene Nacom pia Pejumope tñaxñ tatsi naca cata bichocono

wɔnae tsipei jiwi cana exanatsi xua pexeinaewa peajɔntɔyapɔsɔwa po peajɔntɔyapɔsɔwa ataya tsiteca. Barapo pena jɔntɔ coyene bichocono wɔnae beyacaincha po peitorobi coyene Moisés itoroba. ⁹ Bequein Moisés pia peitorobi coyenewa wɔnae, barapo coyenewaxae Nacom tsitatsi xua jiwi penatsicuentisiwa xeina xua abe peexanaexae. Nama bichocono wɔnae Nacom pia pena jɔntɔ coyenewa po jɔntɔ coyenewa jiwi catatsi beyacaincha Moisés pia peitorobi coyenewa. Barapo Nacom pia jɔntɔ coyenewaxae, jopa tsitatsi xua piamonae tatsi pexeinaewa xua penatsicuentisiwa xua abe peexanaexae. ¹⁰ Moisés pia peitorobi coyenewa tatsi copiya bichocono wɔnae, nama anoxuae jopa peraichiwa, tsipei jopa naca yawenaeyo. Nama Nacom pia pena petsiwɔnae muxu dutsi coyenewa tatsi jame barapo coyene jiwi bichocono yawenatsi. Daxota barapo coyene yatsicaewa wɔnae beyacaincha Moisés pia peitorobi coyenewa tatsi. ¹¹ Poxonae Moisés cata pia peitorobi coyenewa israelmonaetha bapoxonae barapomonae tane Moisés peitabaratha tatsi Nacom pia pexeinya peitɔpanae coicha tatsi. Barapo pexeinya peitɔpanae coicha caewanaya. Nama Nacom pia pena petsiwɔnae muxu dutsi coyenewa jopa caewanayiyo. Nama ataya ayapɔsɔya tsiteca barapo coyene.

¹² Tsipei pajume cowɔntsiya ewatan xua Nacom exanaena daxita pocotsiwa bayatha yabara pana netsiwɔnae muxu duta, daxota jopa paaurinyo xua pata yabara paebiwa daxitan.

¹³ Paxan jopa paexanaeinyo icha Moisés ichi.

Bapon Moisés naitabara acata paparuwatha xua israelmonae jopa peyaputaenexa xua poxonaе barapo pexeinya peitapanae coicha caewanaya. ¹⁴ Barapo israelmonae jopa yaputaeyo Moisés pia peitorobi coyenewa tatsi. Nacom copata xua barapomonae jopa peyaputaewa pia juntu coyeneintha barapo coyenewa. Barichi anoxuae poxonaе barapo israelmonae yoroba Moisés pia peitorobi coyenewa tatsi, cataunxuae came jopa yabara yaputaeyo baxua. Baraxua icha poxonaе Moisés ichi poxonaе naitabara acata paparuwatha poxonaе barapomonae jopa yaputaeyo xua barapo coicha caewanaya. Matauta anoxuae barapomonae jopa yaputaeyo xua icha jiwi jume cowantsina Cristo saya meisa bapoxonaе barapo jiwi itacupatsi xua peyaputaewa Moisés pia peitorobi coyenewa. ¹⁵ Israelmonae beya nama anoxuae, came jopa yaputaeyo Moisés pia peitorobi coyenewa tatsi poxonaе yoroba. Barapomonae jopa peyaputaewa Moisés pia peitorobi coyenewa tsipei najuntu coyene ararana jopa be peyaputaewaxae. ¹⁶ Ichitha poxonaе jiwi jume cowanta Jesucristo pon jiwi Pecanamataxeinaein, bapoxonaе Nacom cana exana xua pejuntu coyeneintha peyaputaewa Moisés pia peitorobi coyenewa tatsi. ¹⁷ Jesucristo pon jiwi Pecanamataxeinaein iru Nacom pia Pejumope tınaxu tatsi najuntu coyene jupabe. Pomonaе ba Nacom pia Pejumope tınaxu tatsi xeina jopa nantawenonaeyo xua peexanaewa pocotsiwa Moisés pia peitorobi coyenewatha itoroba xua daxota Nacom jopa

atene peexanaewa tsane barapomonaetha.
 18 Daxita waxainchi wajume cowuntsixae
 Jesucristo pon jiwi Pecanamataxeinaein, jiwi
 tsita itutatsi xua bara Nacom pia Pejumope
 tñaxu tatsi jopa juniya naca yawenaeyo. Jopa
 daichichi icha Moisés ichi poxonae paparuwatha
 naitabara acata xua jopa peichichipaexae xua
 peitabara taewatsi ichamonae, tsipei bichocono
 itabara daedaena xua Nacom pia peitupanae
 coicha tatsi. Jame waxainchi jinompatsi
 xua ichamonae naca juntu coyene tane, xua
 jiwi beta peyaputaenexa xua bara Nacom
 pon bichocono pexeinaein pejuntu coyene
 xanepanaewa. Nacom pia Pejumope tñaxu tatsi
 naca yawena ducuanabiyana bexa tsane xua
 waxeinaponaewa tsane pena juntu coyenewan.
 Icha Jesucristo ichi pia juntu coyenewatha, barichi
 tsainchi xua wajuntu coyenewantha xua poxonae
 jinompatsi.

4

1 Nacom pata tanaantobexae pana cata barapo
 penacuichiwa. Daxota paxan jopa bapana
 paajuntucoyenefaetabiya cueicueijanyo Nacom
 Pejume Diwesi. 2 Jopa paexanaeinyo xua pata
 yabara cueicueijeiwa po coyene ba jiwi aura
 exanatsi po coyene jiwi moya yawan xeina.
 Matautano jopa paexanaeinyo po coyene xua
 pata muxujainyabiya paebiwa. Barichi jopa
 payabara jume toxeinchiya exanaeinyo Nacom
 Pejume Diwesi xua poxonae ichamonae pata cana
 exanaenexa xua Jesús pejume cowuntsiwatsi.
 Nama apara seicaya papaeban pexainyei jume

diwesi. Daxota poxonaē daxita jiwi pana nejume tane pia jũntũ coyenein tsipaebatsi xua bara xainyeya papaeban. Nacom pana jume tane daxita pocotsiwa papaeban. ³ Poxonaē Nacom pia pecapanenebiyae diwesi jume pacueicueijan, icha jiwi jopa yaputaeyo baxua, apara poxoru barapomonaē weraweracaena, jopa pejume cowũtsixae. ⁴ Jiton ba pon peitata quirein jopa itacũpaetsi xua petaewa. Bara pocotsi jũta coyeneya ichi pomonaē weraweracaena jopa itacũpaetsi xua pejume cowũtsiwa Nacom. Caurimonaē pia pentacaponaein tatsi jiwi jũntũ coyene itorobatsi barapo cae pin nacuathe. Bapon barapomonaē cana exanatsi xua jopa peyaputaewa. Daxota jopa Cristo jume cowũtsichi. Mataũtano bapon jopa copatsiyo xua barapomonaē peyabara jume cowũtsiwa Nacom pia pecapanenebiyae diwesi tatsi. Barapo diwesi bichocono wũnae xua yabara caunuta xua Cristo pexeinya peitũpanae coicha xeina. Bapon Cristo bara Nacom cui jũpatsi. ⁵ Poxonaē pacueicueijan, apara jopa pata coutha pana nayabara cueicueijanyo. Apra Jesucristo payabara cueicueijan xua bapon yatsicaya pepa Wanacanamataxeinaein. Paxan amanaya panacuitan paxam nexa pata taantobexae Jesús. ⁶ Nacom pon xua jeye: “Barabũ pecoicha ba pentha pequireiwatha”, jei. Bapon Nacom exana xua pepatopaewa pata jũntũ coyeneintha pia pexeinya jume diwesi tatsi, po diwesi copiya jopa pata yaputaewa. Pata jũntũ coyeneintha pata xeinaexae barapo diwesi pana itacũpa xua pata yabara yaputaewa Nacom pia

pexeinya peitupanae coicha xua paxan patan, xua Jesucristo pata itabara taewa.

Meje xua Pablo yabara paeba xua pejinompaeya coyenewa xua pejume cowantsi coyeneyatha

⁷ Paxeinan pata juntu coyeneintha peyaputae coyenewa po peyaputae coyenewa pana cana exana xua pata yabara yaputaewa Nacom pia pexeinya peitupanae coicha. Pata pepon saya bichoina weraweraca icha juruwato ichi xua bichoina weraweraca. Pata xeinaexae Nacom pia peyaputae coyenewa, daxota ichamonae patsita itapeinya xeinan xua peayapusu itorobi coyenewa paxeinan xua Nacom pana cata. Daxota apara Nacom piawa, jopa apara patawiyo.

⁸ Bequein jiwi ichawa beya pana juntu coyene jujuta xua abe pata exanaenexa poxonaе abe painta exana, ichitha awiya pana itacupa xua pata panenebiwa bara weya. Bequein bichocono yabara pana najuntu coyene exaban pocotsiwa jiwi painta exana, ichitha awiya jopa paajuntucoyenefaetabinyo. ⁹ Bequein jiwi pana nepu baraina pia abe pata neexanaetsi ichitha Nacom jopa pana copabiyo xua compa pan xua pata necuenta ponaewa. Bequein barapomonae iratha pana bebai xua pata tanejutebiwa tsane, ichitha Nacom jopa pana copabiyo xua barapomonae pata tanejutebiwa.

¹⁰ Daxita nacuantha ichaxota paponeiban jiwi abe pana exaneiba. Barapomonae pana wan dubeiba pata tanejutebeibiwa tsane icha Jesús ichichi xua bexotsi. Poxonaе jopa pabobenaeinyo xua ichamonae jopa pata tanejutebiwa, baxua patsita itapeinya xeinan jiwi xua apara Jesús asu pon pata

taneyawenaexae pia peayapusu coyenewatha. ¹¹ Poxonae cataunxuae pajinompan barapo cae pin nacuathe jiwi ichichipa pata tanejutebeibiwa pata yabara paebi dubenanaebiyaexae Jesús. Daxota baxua jiwitha patsita itapeinya xeinan xua xaniwaicha bara Jesús pana yantsiya popona poxonae jiwi pana wan tane xua poxonae bequein muxu pata bobeneibi. ¹² Pata yabara paebixae Jesucristo jiwi muxu pata tanejutebeibi. Ichitha pata yabara paebixae Jesucristo daxota peajuntu yapuswa paxeiname po peajuntu yapuswa ataya tsiteca.

¹³ Nacom Pejume Diwesitha jeye: “Jume cowuntan daxota cueicueijan”, jei. Paxan pajume cowuntan icha David ichi xua poxonae baxua paeba. Iruru paxandu pajume cowuntan daxota pacueicueijan. ¹⁴ Payaputan xua Nacom Jesús asu exanatsi xua petupae cuiru coyene weya pon jiwi Pecanamataxeinaein. Barichi tsane Nacom asu naca exanaena petupae cuiru coyene weya, caemonae waexanaexaetsi Jesustha. Paxan iru paxamdu Nacom naca caponaena pia xainya beicha. ¹⁵ Daxita pocotsiwan xua ichamonae pana necana exana xua paatanein baxuan paca yawena xua painya nejume cowuntsinexa. Poxonae jiwi equeicha mataropeicha jume cocowuntaponaena Cristo, bapoxonae ayei jiwi Nacom wunae jainchinchí, jei tsane: “Nacom maisa pajuntu coyene weiweinan xua pata taneyawenaewam pata taneantobexaemxae”, jei tsane. Bapoxonae jiwi bichocono wunae jainchina Nacom xua bapon bara beta peexanaexae.

¹⁶ Daxota jopa bapana paajuntucoyenefaetabiya jinompaein. Pata pepon fifinapona. Ichitha pata juntu coyene equeicha mataropeichiya asuya ayapusu tsoponeibi daxita maticabin. ¹⁷ Po coyenein xua barapo cae pin nacuathe icha-monae atene pata tana neexanaewa jopa pana netsita ainya cuiyo tsipei saya bara caeto pana atene exana. Barapo atenewa pata tana neexanaewa pana neyabara nacui wunaeta xua bexa tsane Nacom pata tana necatsibiwa tsane po coyenein xua bichocono wunaeta xua po coyene ataya pata xeinaewa tsane po coyene xua pex-einya peitupanae coichaxae. ¹⁸ Jopa bichocono pacayabara nanta xeineibinyo po coyenein painta daunwei xua jiwi atene pata tana neexaneibixae barapo cae pin nacuathe. Jame maisa bichocono pacayabara nanta xeinan po coyenein xua Nacom pana juntu coyene weiweina exanaena. Pocotsiwan xua jiwi pana necana exana barapo cae pin nacuathe weraweracaena. Nama xua pocotsiwan Nacom painta exanaena baxua ataya ayapusu tso-ponae.

5

¹ Pata pepon xua saya pata yawa jinompaenexa barapo cae pin nacuathe nexa icha bouto ichi xua saya pecuenta werapaenexa barapo cae pin nacuathe. Poxonae pawerapaein pata pepon weraweracaena icha bouto ichi. Bapoxonae payaputan xua Nacom icha pepon painta xeina xua pena pepon pia nacuatheicha. Barapo pepon ataya payawa jinompaein. Barapo pena pepon Nacom exana, jiwi jopa exanaeyo. ² Anoxuae

bichocono pana najuntũ coyene exaban tsipei bichocono bepaxeinaein icha pena pepon po pena pepon Nacom xeina pia nacuatheicha. ³ Barapo pena pepon Nacom pana cata xua jopa pata jinompaenexa athabeicha poxonae jopa paxeinaeinyo pepon. ⁴ Poxonae cataunxuae barapo pepon payawa jinompan barapo cae pin nacuathe bichocono pana najuntũ coyene exaban tsipei jiwi painta ayapube exana pata pepontha. Ichitha jopa paichichipaeinyo xua pata jinompaewa be poxonae jopa paxeinaeinyo barapo peru pepon xua pata bebeixae. Jame paichichipan xua pata yawa jinompaewa pena pepon. Po pepon anoxuae payawa jinompan saya werapaena. Paichichipan xua equeicha pata xeinaewa pena pepon po pena pepon xua ataya asaya pata yawa jinompaewa tsane. ⁵ Nacom pana necui yabara wunaeta xua barapo pena pepon pana catsina. Nacom pana cata pia Pejumope tñaxũ tatsi xua pana netsita itapeinya xeina xua bexa tsane Nacom pena pepon xaniwaicha pana catsina.

⁶ Daxita matakabin ajuntũsuya pajume cowanteiban Nacom pon jiwi Pecanamataxeinaein. Payaputan xua poxonae cataunxuae barapo cae pin nacuathe payawa jinompan barapo peru pepon. Cataunxuae yatsicaya Jesucristo tajũ tsana pana cuenta eca, jopa cataunxuae pata xeinaexae barapo pena pepon. ⁷ Pajinompan pata jume cowantsiya coyeneyatha Jesús, xua bapon exanaena pocotsiwan bapon paeba, bequein cataunxuae jopa pana nebarũ jinompaeyo itabocotheicha. Apra jopa pajinompaeyo xua pata tataewaxae ichawa.

8 Ajuntusya pajume cowanteiban Nacom. Paichichipan pata bebeiwa barapo peru pepon xua po pepon anoxuae payawa jinompan pata jinompaenexa ichaxota Jesús popona pon jiwi Pecanamataxeinaein. 9 Bichocono paichichipan xua pata exanaewa pocotsiwa bapon Jesús pon jiwi Pecanamataxeinaein ichichipa bequein barapo pepon payawa jinompan barapo cae pin nacuathe, matautano ichacuiha metha bequein poxonaе painompan Nacom pia nacuatha. 10 Bexa tsane daxita waxainchi bewa umenaeinchi Cristo peitabaratha. Bapoxonaе barapo mataqueitha bapon yabara paebina jiwi xua penatsicuentysiwa xua abe peexanaexae Nacomtha. Daxita barompaya matoma xeinaena pocotsiwa pia peexanaexae poxonaе cataunxuae jinompa barapo cae pin nacuathe. Pomonaе wunaeya tanacuita xuya wunaeya matoma catsibinchi. Pomonaе jopa xapain tanacuichiyo xuya antomabeya catsibinchi.

Meje xua Pablo yabara paeba xua juntema peji-nompae coyenewa yabara

11 Yaitama payaputan xua bewa pacunuwin Nacom pon jiwi Pecanamataxeinaein pata baru cui itura jinaenexa bapon. Daxota pamuxuwetan jiwi xua bewa jume cowantsina Jesús. Nacom pana juntu coyene yaputane xua xainyeya bepataexanaein. Barichi paichichipan xua paxam pana juntu coyene yaputaneme beta. 12 Paxan jopa paichichipaeinyo xua pata coutha pata nayabara paebiwa xua pata paca catsipaebiwa tsainchi xua pata ainya cui jiwixae

xua daxota pata tanebaru cui itura jinaewam tsane. Jame nama paca tsipaebatsi po coyene xua pana nayabara paeban xua painya pata taneweyataenexa. Matautano paca tsipaebatsi xua ichamonae painya nejume noteibinexa poxona ichamonae abeya pana neyabara paebeiba. Barapomona pia coutha atsaquiya nayabara paeba xua daxita xanepanaya peexanaexae po coyenein xua jiwi cui tane. Ichitha barapomona jopa najuntũ coyene yabara tsaqueinaeyo xua po juntũ coyenein xeina pia juntũ coyeneintha po jantũ coyene jopa wunaeyo.

¹³ Barapomona pana neyabara nanta xeina xua paxan pomona pata tanentsiyabi jiwi pan xua poxona pata cueicueijeixae Nacom Pejume Diwesi. Icha barapomona baxua pana neyabara nanta xeina apara poxoru Nacom pata taantobexae. Icha barapomona jopa pana yabara nanta xeinaeyo xua paxan pomona pata tanentsiyabi jiwi pan, apara poxoru saya pata paca yawenaexaetsi. ¹⁴ Cristo pata tana neantobexae paichichipan xua pata tatanacuichiwanexa bapon. Bara xaniwaicha payaputan xua Cristo tsitũpa daxita jiwi pomona pia pejume cowuntsiwichixaetsi. Daxota Nacom patsitan xua paxan be pomona pata werapaewi pan abe pata exanaexae. ¹⁵ Cristo tsitũpa daxita jiwi, xua daxita jiwi pejinompaenexa Cristo nexa peexanaexae pocotsiwa bapon tsita xanepanatsi. Barapoxona jopa jinompae tsane po coyeneya poxona tsita xanepanatsi barapomona. Jame barapomona bewa jinompae Cristo nexa pon naetotha tũpa xuano xua equeicha asũ exanatsi.

¹⁶ Anoxuae jopa payabara nanta xeinaeinyo xua pata yaputaewa jiwi pia pejuntũ coyenein tatsi xua saya poxonaе pacui tan poxonaе po coyenein exana icha pomonaе jopa pejume cowantsiwi ichi. Barapomonaе nanta xeineiba xua jiwi pejuntũ coyene yaputaenexatsi xua saya poxonaе cui tainchi xua exaneiba. Bequein copiya bayatha Cristo jopa wũnaeya payabara nanta xeinaeinyo, ichitha anoxuae jopa baxua paraichinyo poxoru anoxuae bara xaniwaicha payaputan bapon. ¹⁷ Pon caein naexana Cristotha pejume cowantsixae bapon pena juntũ coyene xeina. Po coyenein xua bayatha exana xua peru juntũ coyenein weraweracaena. Anoxuae equeicha icha pena juntũ coyenein exanaena.

¹⁸ Daxita barapo pena juntũ coyenein Nacom werena pona. Nacom naca cana exana xua piamonaе jiwi tatsichi pomonaexaetsi bequein copiya Nacom pia peaitafaetabi jiwi tatsichi. Baxua Nacom naca cana exana Cristo wanaca tsitũpaexae. Matautano Nacom pana itoroba xua paxan xuya ichamonaetha pata cana exanaenexa Nacom piamonaе tatsi pomonaexae bequein copiya Nacom pia peaitafaetabi jiwichi.

¹⁹ Pocotsiwa xuaunxuae paca tsipaebatsi xua apara meje: Nacom junteма jinompa cana exana barapo cae pin nacuathe pomonaе copiya pia peaitafaetabi jiwichi poxonaе barapomonaе yabara jume cowanta xua Cristo tsitũpa barapo jiwi. Bapoxonaе Nacom jopa tsitatsi xua barapo jiwi penatsicuentsiwa xua abe peexanaexae. Matautano Nacom pana cata penacuichiwa po penacuichiwa xua pata cueicueijeinexa

jiwitha. Po diwesi yabara xua Nacom piamonae cana exana jiwi, pomonae bequein copiya pia peaitafaetabi jiwichi, barapo diwesi pacueicueijan. ²⁰ Paxan pomonae Cristo pata taneitorobi jiwi pan pata cueicueijeinexa bapon nexa. Bequein bara paxan paca tsipaebatsi, apara jame yatsicaewa Nacom paca tsipaeba poxonae paca tsipaebatsi. Cristo patacueicueijan poxonae jume daunweya paca jeichi: “Pana nacui barapende abe painya neexanae cuiru coyenein. Pajume cowunde Cristo caemonae painya nenaexanaenexa Nacomtha”, paca jeichi. ²¹ Cristo bapana jopa abe exanae. Ichitha Nacom tsitatsi xua Cristo penatsicuentsiwa xua poxoru abe waexanaexae. Bapoxonae Nacom naca cana exana xua caemonae wanaexanaewa bapontha xua wajuntɔ coyenein xanepanaenexa Cristo pia peexanaexae poxonae naca tsitɔpa. Bapoxonae Nacom tsitatsi xua jopa watsita natsicuentsiwa bequein abe waexanaethatsi.

6

¹ Nacom pata tana nebarɔ nacuita dubenanaebiyaexae, jume daunweya paca muxu tsipaebiya jeichi: “Painya xoba panaitematame po diwesi xua Nacom paca cata paca necaantobexae. Barapo diwesi apara xua Nacom juntɔ coyene xanepana exana jiwi pomonae pejume cowantsixae”, paca jeichi. ² Tsipei Nacom, pewanaeya poxonae xua jiwi yabara cui cananta xeinaeinchi peyawenaenexa tsainchi, Nacom Pejume Diwesitha namchi, jeye: “Po matakabi jiwi yabara cui cananta

xeinaein tayawenaenexa tsane, barapo
mataqueitha paca jume taeinchi.

Po matakabitha jiwi capanenebiyaein
paxam yawa paca yawenaeinchi”,
jei Nacom Pejume Diwesitha.

Anoxuae apara barapo matakabi jopa, po
mataqueitha Nacom naca yabara cui cananta
xeina wanaca yawenaenexa.

³ Poxonae Nacom patanacuita dubenanaebiyān
paichichipan xua daxita jiwi xaniwaicha pata
tatsita jinompaewa, xua daxota daxita jiwi
pejume cowantsiwanexa. Jopa abe paexanaeinyo
bequein xua tsiwiyo xua abe pata exanaewa xua
jiwi pata nejume aebiyainwa Nacom Pejume
Diwesi poxonae patsipaeban. ⁴ Jame apara
daxita beta paexana dubenanaebiyān jiwi pata
tsita itapeinya xeinaewa xua apara jiwi pata
taneyaputaenexa xua Nacom patanacuitan.
Baxua paexanan poxonae awiya saya junte
pajinompan poxonae bequein ichamonae
atene pana exana, xuano bequein painta seica
pocotsiwa panantawenonan, xuano bequein
poxonae bichocono painta yapu daunwei
tsaibi poxonae paexaneiban. ⁵

Ichacuitha jiwi pana beiba bichocono. Matautano
ichacuitha jiwi pana cuaranobeiba jiwi pecabi
bontha. Matautano ichacuitha jiwi ayei jiwi
anaepanaya pana netsaquibabeiba poxonae
jiwi ayei аснч. Poxonae panacuiteiban,
bichocono ayapusya panacuiteiban. Ichacuitha
merawitha jopa pamaiteibinyo tsipei saya
paexaneiban Nacom pia penacuichiwa tatsi.
Ichacuitha tsaibi bichocono pajainpeiban. ⁶ Jiwi

patsita itapeinya xeinan xua paxan pomonae Nacom pia petanacuichi jiwi tatsi pan xua Nacom pata tsita juntu coyene xanepanaexae, matautano tsipei poxoru payaputan pocotsiwa pexainyei jume, matautano jopa pata casebixae pomonae bequein painta abe exana, xuano xua xanepanaya pata taexanaexae ichamonae, matautano Nacom pia Pejumope tuxaxu tatsi pata tanebaru jinompaexae, xuano xua ichamonae xaniwaicha pata taantobexae. ⁷ Bara xaniwaicha payabara paeбан po coyene pexainyeiwa. Paxan paxeinan Nacom pia peayapusu itorobi coyenewa tatsi. Pata Nacom pata tsita juntu coyene xanepanaexae, paxeinan pocotsi coyenewa xua panantawenonan xua pata tacueicueijeinexa Nacom. Paxan panacui wetan xua Nacom patanacuitan. ⁸ Ichacuitha jiwi pana nebaru cui itura jineiba, ichamonae jopa pana tsita daicheibiyo. Ichacuitha ichamonae wunaeya pana neyabara paebeiba. Ichacuitha ichamonae abeya pana neyabara paebeiba. Ichamonae pana neyabara paebeiba xua paxan pomonae jiwi pata muxuitorobi jiwi pan. Ichamonae pana neyabara paebeiba xua paxan pomonae aparta xaniwaicha pata paebi jiwi pan. ⁹ Ichacuitha ichamonae jopa ichipaeyo xua pata taneyabara yaputaewa xua paxan Jesús pia peitorobi jiwi tatsi pan. Pana yabara nanta xeina xua saya jiwi pan bequein daxita jiwi bara xaniwaicha pana neyaputane xua paxan Jesús pia peitorobi jiwi tatsi pan. Ichacuitha ichamonae pana neyabara nanta xeineiba xua paxan bara imoxoyo muxu pata bobeneibi, ichitha awiya asuya pajinompeiban.

Jiwi pana neatene exaneiba, ichitha jopa pana nejutebeibiyo. ¹⁰ Bequein ichacuitha bara pajuntũ coyene wecoyan pata painta exanaexae ichamonae, daichitha awiya pajuntũ coyene weiweinaya jinompeiban. Metha bequein paxan be pomonae peacopeibiwi pan tsipae ichitha paxeinan nawita Nacom weya pocotsiwan xua payawenan ichamonae. Bapoxonae barapo ichamonae be pomonae copei pexeinaewi naexana tsipei jume cowanta Nacom Pejume Diwesi xua papaeban. Bequein bara be pomonae jopa pata xeinae jiwi pan pocotsiwa xeina po cae pin nacuathe, daichitha apara bara paxeinan daxita po coyenein Nacom pana cata po coyenein xua jopa peweraweracaewa.

¹¹ Tamonae pam, paxam pomonae Corinto tomarapiwi pam. Daxita xua po coyenein tajuntũ coyenewatha nanta xeinan baxuan paca tsipae-batsi. ¡Bichocono tajuntũ coyenewatha paca antobetsi! ¹² Amanaya bichocono jopa juniya paca antobetsi. Ichitha nama paxam barapomonae pam, pomonae pam jopa paichichipaem xua painyamonae jiwi tapana neexanaewam. ¹³ Xan paca tsipaebatsi xua be poxonae icha coxiyũn ichi xua tsipaeba pia pexuyotha. Paca jeichi: “Xuya daxita painya nejuntũ coyenewatha paneantobeinde icha paca ichichi xua tapaca antobewatsi bichocono”, paca jeichi.

Meje poxonae Pablo jeye: “Icha Nacom ichi xua popona pia pin botha barichi Nacom pana nebarũ jinompa”, jei

14 Jopa caemonae pana naexanaeinde pomonaetha pomonae jopa pejume cowantsi jiwi. Tsipei pon pejuntũ coyene xanepanaein jopa itacũpaetsi xua pecueyatsiwa pontha pon peajuntũcoyenebein. Barichi xua pequireiwatha peyonoyoneiwa jopa itacũpaetsi xua quirei tsanaya baxota, awiya peyonoyoneixae.

15 Barichi Cristo pon xanepanaya peexaneibin jopa itacũpaetsi xua pecueyatsiwa caurimonae pia pentacaponaeintha tatsi, pon abe peexaneibin. Barichi pon pejume cowantsin jopa itacũpaetsi xua pecueyatsiwa pontha pon jopa pejume cowantsin, poxoru jopa jũpaeyo xua nanta xeinabe. 16 Barichi Nacom pin pia botha jiwi jopa bewa wũnae jainchina ibo nacomũn. Saya meisa bewa wũnae jainchina Nacom barapo botha. Nacom patsitan xua paxan bara be Nacom pin pia bo tatsi. Icha Nacom ichi xua popona pia pin pia botha, barichi Nacom naca barũ jinompa, pon ataya asũya popona. Nacom caena bayatha baxua yabara jeye:

“Barapomonae barũ poponaein yawa cueyata ducuaenaebiyaein.

Mataũtano barapomonae pia Nacomũn tatsin tsane.

Barapomonae tamonae naexanaena”, jei Nacom.

17 Daxota Nacom pon Pecanamataxeinaein jiwi, equeicha yabara paeba pomonae jopa pejume cowantsiwi. Nacom piamonaetha jeye:

“Barapomonae pia xainya weya paponare.

Jopa caemonae pana nayawa exanaeinde barapomonae.

Jopa paexanaeinde peabe coyene po

coyene barapomonaexana.

Nexata xan paca matenta weyataeya wabinchi.

¹⁸ Xan naexanan xua xan painya Axan.

Matautano paxam taxanton jiwi pam tsane,

xuano iru taxantixi jiwi pamdu”,

jei Nacom piamonaetha pon daxita peayapusu

itorobi coyenewan pexeinaein.

7

¹ Tamonaex pam, paxam pomonaex tapaca caantobe jiwichi pam. Xuaunxuae po diwesi paca tsipaebatsi baraxuan apara Nacom yabara naca tsiwunaex muxu duta xua pocotsiwa wanaca cana exanaewa. Daxota waxainchi bewa daxita abe waexanaex cuiru coyenewan pentichi po coyenewan xua wapepon exana, xuano xua wajuntu coyene nanta xeinano. Matautano bewa xua Nacom junuwiya wabarui cui itura jinaewatsi tsainchi. Matautano bewa xanepanaya exanaponaetsi beya poxonaex bichocono Nacom watsita juntu coyene xanepanaewa tsane xua jopa wanatsicuenta siwa xua abe waexanaexaex bapontha.

Meje xua poxonaex Corinto tomarapiwi icha juntu coyene xeina xua Jesús pejume cowuntsixaetsi

² Equeicha caewa pana neantobeinde tsipei paxan jopa abe pacata exanaetsi. Paxan jopa abeya pamatacaponaexinyo ichamonaex xua xuya abe peexanaenexa. Matautano ichamonaex jopa pamuxujainyabeibinyo. ³ Jopa baraxua paca tsipaebichi xua paca yabara paebatsi xua abe painya neexanaewam. Bayatha copiya paca tsipaebatsi, paca jeichi: “Tajuntu coyenewatha bichocono

paca antobetsi, bequein metha poxonaē paca baru werapaetsipatsi, xuano metha bequein poxonaē paca baru jinompaetsipatsino”, paca jeichi. ⁴ Bara bichocono paca yabara jume cowuntatsi xua po coyene tapaca catsipaebi watsi tsainchi pocotsiwa tajuntu coyenewatha nanta xeinan xua pocotsiwa painya neexanaenexa tsane. Matautano paca yabara wunaē jaintatsi poxonaē ichamonaē tsi-paeban poxoru tapaca cui yabara paebixaetsi. Bequein ichamonaē atene neexana, daichitha poxonaē jume tan pocotsiwa paexaname pana nejuntu coyene tsacaba exaname xua junte ma tapoponaewa. Matautano barichi bichocono panejuntu coyene weiweina exaname.

⁵ Poxonaē po mataqueitha weya papatan Macedonia nacua weya jopa cuinaya junte ma painompaeyno xua jiwi abe pata tana necana exanaewa daxita coyeneintha. Pomonaē jopa pejume cowuntsiwi bichocono pana casebeiba pata natsipei cueicueijeixae Jesús pejume diwesi. Barichi pomonaē pejume cowuntsiwi junuwiya payabara najuntu coyene exabeiban nawita xua jopa xanepanaya pejinompaewa tsipae. ⁶ Daichitha Nacom pana juntu cui coyene tsacaba xua junte ma pata jinompaewa poxonaē bequein paatanein tsaibi. Barapon Nacom apara pon jiwi cana exanatsi xua junte ma pejinompaewa poxonaē bequein juntu coyene wecoyei. Baxua Nacom pana necana exana poxonaē Tito patopa pata xantha. ⁷ Pajuntu coyene weiweinan xua bapon pepatopaexae. Ichitha jame yatsicaewa pana nejuntu coyene tsacabame xua poxonaē bapon pana netsipaeba

xua pinae xanepanaya pata exaname bapon. Bapon pana netsipaeba paxam yabara xua pinae pajam: “Maisa Pablobar_u bepataebenaen. Bichocono pawecoyan yaitama Pablobar_u abe exanatsi ichamonae. Daxota payabara najunt_u coyene exaban bapon”, pinae pajam. Poxonae baxua jume tan bichocono junt_u coyene weiweinan.

⁸ Bequein xan paca junt_u coyene wecoyei exanatsi xua po cartatha copiya pacata tinatsi, daichitha anoxuae baxua jopa yabara auranyo bequein copiyatha yabara auran baxua. Barapo carta saya bara caeto paca junt_u coyene wecoyei exana. ⁹ Ichitha anoxuae junt_u coyene weiweinan xua jopa apara poxoru painya nejunt_u coyene wecoyeixae poxonae payorobame barapo carta, saya apara jame poxoru Nacom icha junt_u coyene painya netsita xeinaexae. Paxam pajunt_u coyene wecoyam icha be pocotsi coyeneya Nacom peichichipaewa xua abe painya neexanaexae. Daxota paxan jopa abe pacata exanaetsi. ¹⁰ Poxonae jiwi junt_u coyene wecoyei icha be pocotsi coyeneya Nacom ichichipa, barapo peitanuwetha jiwi cana exanatsi xua peaurawa abe peexanaexae bapoxonae barapo jiwi Nacom jume cowuntatsi. Bapoxonae Nacom jopa tsita natsicuentichi xua abe peexanaexae. Barapomonae icha junt_u coyenein xeina poxonae barapomonae capanenebiyatsi abe pia peexanae cuiru coyenein weya tatsi. Bapoxonae barapomonae jopa bewa aura tsane xua copiya junt_u coyene wecoyei. Ichamonae pomonae jopa pejume cowuntsiwi Nacom, poxonae

barapomonae wecoyei xua jopa peauraxae poxonae abe exana, ichitha barapo itanuwetha barapomonae jopa yawenaetsi. Apra saya barapomonae werapaena Nacom petsita abe exanaexaetsi. ¹¹ Po itanuwe Nacom pacata copata bayatha jame barapo itanuwe paca yawena. Barapo itanuwe paca exana xua paca juntu coyene tsacaba xua beta painya neexanaenexa. Matautano paca exana xua pacui yabara nanta xeiname pon abe peexanaein. Bapoxonae nainya paitawetame bapon, abe peexanaexae. Barichi be patsita itapeinya xeiname Nacom xua paxam jopa panatsicuentstim xua jopa be barapocotsi coyenewiyo pocotsi coyenewa xua bapon exana. Matautano pauram xua painya necopatsiwa bapon xua bara abe peexanaewa. Matautano pajunuwame xua Nacom atene paca exana poxoru bapon abe peexanaexae. Bapoxonae be pabebam painya xainya weya po coyene xua bichocono abe. Daxota paitawetame bapon. Daxita beta paexaname. Painya netsita itapeinya xeinaewa Nacomtha xua apra daxita paxam jopa abe paexanaem. Saya meisa bapon abe peexanaexae. ¹² Bayatha pacata tinatsi po carta xua paca itanuwe exana xua Nacom painya tsita itapeinya xeinaenexa xua xaniwaicha bara pana neantobem painya neexanaexae pocotsiwa paca itorobatsi. Apra jopa pacata tinaetsi xua saya poxoru tayabara nanta xeinaexae pon abe exana, xuano iru pon coseuri pitatsi, xua tayawenaewa tsane. ¹³ Pata taneantobemxaem pana nejuntu coyene tsacabame xua tajuntu coyene weiweinaewa.

Barichiru daxita paxam Tito pajuntu coyene cui tsacabame daxita pocotsiwantha xua beta painya paebixaem bapontha. Jame yatsicaewa bapoxonae bichocono pajuntu coyene weiweinan xua poxonae Tito pacana exaname, beyacaincha poxonae pana necana exaname xua poxonae pajuntu coyene weiweinan. ¹⁴ Poxonae Tito taxainya weya bara muxu peponaeba matha beta paca yabara paebatsi bapontha, janje: “Maisa Corinto tomarapiwi pomonae pejume cowantsiwi weyatan xua bichocono pejuntu coyene xanepanaexae Nacomtha”, jan. Paxam jopa panejuntu coyene aura exanaem. Xua ba paca tsipaebeibatsi baraxua bara pexainyeiwa tsaibi. Matautano pocotsiwa paca yabara paebatsi Titotha baxua apara bara pexainyeiwano iru. ¹⁵ Bapon Tito bichocono paca antobe anoxuae beyacaincha poxonae cataunxuae jopa paca siwa ponaeyo. Bapon paca yabara juntanaina xua paxam pabaru jume jejam tsaibi pocotsiwa paca itorobeiba. Matautano bapon pantenta weyataeya wabame painya baru itura jinaexae bapon. Matautano pajunuweibame xua abe painya neexanaeyainwa bapon. ¹⁶ Maisa bichocono juntu coyene weiweinan xua tapaca yabara jume cowantsiwatsi xua daxita coyenewan painya neexanaewaxae po coyene xua wuna.

8

Meje xua poxonae Pablo yabara paeba xua Cristo piamonae tatsi paratixi pecacomocae paratixijehebapona pomonae peacopeibiwi nexa

¹ Tamonaē pam, paichichipan xua painya neyabara yaputaewa xua Nacom pia peyawenaewa jiwi, pia peantobexae. Ichichipan xua tapaca tsipaebiwatsi po coyene Nacom tsita itapeinya xeina barapo pia peantobe coyenewa pomonaetha pomonae pejume cowantsiwichi, pomonae penacaetutsi bonmonae jiwi xua pomonae wɥnae pejainteibiwi Nacom pomonae xua Macedonia nacuatha jinompa. ² Bequein barapomonae bichocono daunweya jɥntɥ coyene jɥjɥtatsi poxonaē ichamonae abe taexana barapomonaetha, daichitha awiya cataunxuae barapomonae jɥntɥ coyene weiweina. Bequein barapomonae peacopeibi jiwi, daichitha barapomonae catsibeiba nawita paratixi pecacomocae paratixi petaitorobinexa pomonaetha pomonae peacopeibi jiwi Jerusalén tomarapiwi be poxonaē yatsicaewa pepa copei pexeinaewi. ³ Xan tan xua barapomonae cata nawita be po coyeneya xua daxita itacɥpatsi xua pecatsibiwa. Matautano ichawano catsiba beyacaincha xua poxonaē itacɥpatsi xua pecatsibiwa. ⁴ Barapomonae bichocono pana muxu fayacotsiya jeye: “Bara pana copare xua bara Jerusalén tomarapiwi patacatsibinexa paratixi pecacomocae paratixi pomonae irɥ pejume cowantsiwi, pomonae peacopeibi jiwi”, pana jei. ⁵ Barapomonae baxua exana beyacaincha xua pocotsiwa pananta xeinan xua barapomonae itacɥpatsi xua pocotsi coyeneya pecatsibiwa tsane. Matautano barapomonae juntucuru nanta xeina xua bara petanacuichinexa tsane Nacom nexa daxita

pejantꝯ coyeneinyatha. Bapoxonae juntucuru nanta xeina xua barapomonae bara pata taneyawenaenexa tsane be pocotsi coyeneya Nacom ichichipa. ⁶ Daxota Tito paitoroban xua nacui wetsina xua penonotaponaewa tsane paratixi pecacomocae paratixi, tsipei bapon bayatha caena tamropata pitaba xua penonotaponaewa paratixi painya xantha. Poxonae barapo paratixi pacatsibaponame bara pexeinya coyene paexanaponame peacopebiwitha painya neantobewaxae. ⁷ Paxam bichocono jopa juniya paxeinaem po coyenein xua painya neexanaewa. Bichocono pajume cowantame Nacom. Matautano betiya pacueicueijam Nacom Pejume Diwesi, xuano bichocono payabara yaputaneme Nacom Pejume Diwesi. Matautano bichocono painya jantꝯ coyenewatha paichichipame xua ichamonae painya neyawenaewa. Matautano bichocono pana neantobem. Daxota bichocono jopa juniya toxeinchiya paexanaeinde xua painya neyawenaewa xua poxonae paratixi pacatsibame pomonaetha pomonae irꝯ pejume cowantsiwixae. Baraxua paexande painya neantobexae barapomonae.

⁸ Poxonae baxua paca tsipaebatsi jopa paca itorobichi xua painya neexanaewanexa. Saya apara jame paca tsipaebatsi baxua xua tayaputaenexa icha bara metha paxam bichocono paantobem ichamonae icha Macedonia nacuamonaepiwi ichi. Barapomonae bichocono antobe ichamonae daxota yawena nawita.

⁹ Paxam payaputaneme xua Jesucristo naca

antobe pon Wanacanamataxeinaein. Jesucristo poxona Paxatha popona copiya daxita xeina be poxona yatsicaewa copei pexeinaein. Daichitha bapon pia coutha nacana exana be pocotsin jopa copei pexeinaein poxona paxa cuenta pona. Poxona jiton pia coyeneya nacana exana bapoxona acopeibi nacana exana pia paca necaantobewaxae. Daxota xuya nawita painya nexei nae jiwi pam tsane xua po coyenewa Jesucristo xeina.

¹⁰ Paca tsipaebatsi baxua painya tapaca cayawenonaexaetsi. Nanta xei na xua paxam bewa panacui yabara wetsiname pocotsiwa xua bayatha icha weitha patamropata notarucupame xua paratixi painya nejehebaponaewa Jerusalén tomarapiwi nexa. Baxua bayatha paexaname painya juntu coyeneintha bichocono painya neichichipaexae xua painya neexanaewa baxua.

¹¹ Icha copiya paichim xua paichichipame nawita xua painya neexanaewa baxua, paexanaponde beya poxona panacui yabara wetsiname. Padodoutaponde xua be pocotsi coyene paca cui jupa xua pocotsi matoma paxeineibame xua pajiwana tsabeibiname paratixi. ¹² Icha pebin ichichipa xua pecatsiwa paratixi Nacomtha bapon bara nata jiwana wetsatsina paratixi xua catsina be pocotsi coyene xua cui jupatsi xua pecatsiwa. Pocotsiwa bapon cata bara Nacom wecobe pita. Saya poxoru Nacom jopa pewucaexae poxona pebin bequein jopa xei naeyo taethatsi. Saya jame icha jiwi cui jupatsi xua pecatsiwa poxona xeina, bapoxona jame Nacom wecobe pita.

¹³ Jopa paca tsipaebichi xua ichamonae bewa payawenaename xua painya necatsibiwa daxita xua paxeiname xua beya poxonaе daxota painya neacopeibiwa tsane. ¹⁴ Saya jame paca tsipaebatsi xua paxam copei pexeinaewi pam iru peacopeibiwi Jerusalén tomarapiwi bewa peburuяa jupaeya paxeinaename. Metha anoxuae paxeiname nawita, ichitha barapomonaе jopa xeinaeyo. Daxota paxam pomonaе nawita painya nexeinae jiwi pam bewa pacatsibiname pomonaetha pomonaе jopa xeinaeyo pocotsiwa barapomonaе nantawenona. Metha bexa tsane barapomonaе xeinaena nawita ichitha paxam jopa paxeinaem tsane. Bapoxonaе bewa barapomonaе xuya paca catsibina pocotsiwa panantawenoname. Bapoxonaе daxita pam nanta jupaeya paxeinaename. ¹⁵ Nacom Pejume Diwesitha baxua yabara jeye: “Pon nawita pexeinaein copiya, beyacaincha xua pocotsiwa nantawenona, bapon jiwana wecata ichantha pocotsiwa xua jopa pecanantawenonaexae. Pon xua tsiwiyo xeina copiya xua daxota taseicatsi pocotsiwa nantawenona, pirapae xeina pocotsiwa pecanantawenonaewa poxoru pon nawita xeina piawa jiwana wecata bapontha”, jei Nacom Pejume Diwesitha.

Meje xua Tito yabara iru pomonaе pia peyanabi-watsiru

¹⁶ Tsipaeban Nacom, janje: “Nacom maisa juntu coyene weiweinan xua Tito pejuntu coyenewatha yabara nanta xeina ducuanabiya Corinto tomarapiwi xua peyawenaenexa barapomonaе

icha xan ichin”, janje. ¹⁷ Bapon Tito juntu coyene weiweina poxona patsipaeban xua pia paca necayawenonaewa tsane. Daxota anoxuae bapon pia coutha paca siwa ponaena peichichipaexae xua pia paca yawenaetsi.

¹⁸ Ichandu paitoroban pon pejume cowantsindu xua Tito pepuna ponaenexatsi. Daxita pomonae pejume cowantsiwi pomonae penacaetuteibi jiwi xua wuna pejainteibiwi Nacom barapomonae bapon beta yabara nanta xeinatsi, tsipei pinae bapon beta xanepanaya cuiduba Nacom pia pecapanenebiyae diwesi jume. ¹⁹ Jopa meisa pebaxuaxae. Jame yawa matautano barapomonae pomonae pejume cowantsiwi peitapetsixae barapo pebin xua bapon pata tanebaru ponaenexa poxona pacapanan paratixi peacopeibiwitha pata antobexae barapomonae. Barapo penacuichiwa pata exanaexae pabaru cui itura jinan Nacom pata exanaexae pocotsiwa bapon pana itoroba. Matautano poxona baxua paexanan patsita itapeinya xeinan xua paichichipan xua nantiya pata tanayawenaewa.

²⁰ Paichichipan xua xaniwaicha beta paexanan poxona pin paratixi cun pacaponan xua jiwi abe pata neyabara paebiyainwa. ²¹ Paichichipan nawita xua xainyeya pata exanaewa Nacom peitabaratha tatsi xuano xua jiwi peitatha tatsino.

²² Barichino ichunno paitoroban pon pejume cowantsindu xua baponbe Tito pepuna ponaenexa tsainchibe. Bapon pon cotacaya paitoroban, pajuntu coyene jujutan pata yaputaenexa icha bara metha beta nacuita Nacom nexa. Bara bapon beta jume cowanta

ducuanaebiya. Daxota bapon iru paitoroban. Bapon ichichipa nawita xua pia paca yawenaewa tsane pia paca yabara jume cowantsixae xua bara beta paexaname. ²³ Icha ichun paca yabara yainyaba Tito pana nejume cayabara jume jande bapontha xua janje: “Bapon taneyantsin. Bapon neyanta xua penacuichiwa po penacuichiwa xua tapaca yawenaewatsi. Ponbe Tito puna poinchibe baponbe itorobatsibe pomonae pejume cowantsiwi. Baponbe tsita itapeinya xeinabe barapomonaetha xua bara xaniwaicha pejume cowantsinbe Cristo, xua daxota barapomona wnae pejainchinexa Nacom”, pana nejume cayabara jande. ²⁴ Barapo acoibi poyobe xaniwaicha pantenta weyataeya wabare poxona patsina painya xantha. Bapoxona poxona baxua paexaname patsita itapeinya xeinaename pomonae pejume cowantsiwi xua xaniwaicha bara paantobem barapo acoibi poyobe. Bapoxona barapomona paca yabara cui yaputaena, xua paxan xaniwaicha papaeban xua poxona juntu coyene weiweinaya atsaquiya tapaca yabara paebiwatsi xua painya nejume cowantsixae.

9

Meje xua paratixi pejehebaponaewa yabara pomonae pejume cowantsi jiwi nexa, pomonae peacopeibi jiwi xua pomonae Jerusalén tomarapiwi

¹ Jopa nantawenonaeyno xua equeicha tayabara tinaewa xua painya neyawenaenexa ichamonae pomonae iru jume cowanta xua painya necatsibinexaru paratixi pomonae

Jerusalén tomarapiwi. ² Bara yaputanba bayatha xua bichocono painya neichichipaewa xua painya necatsibiwa paratixi. Paca yabara paebeibatsi Macedonia nacuamonaepiwitha, janje: “Bayatha icha weitha Acaya nacuapiwi najuntũ cui coyene wũnaeta xua jehebaponaena paratixi peacopeibiwi nexa”, jan. Barapo Macedonia nacuapiwi, najuntũ cui coyene tsacaba xua irũ pebarichinexarũ pejume taexae xua pinae paxam paichichipame nawita po coyene painya neyawenaewa. ³ Barapo acoibi poyobe itoroban xua ichamonaе jopa taneyabara paebinexa tsane xua tanaerabiwa xua bayatha tapaca yabara paebixae. Daxota bewa pana nacui wũnaetsiname xua painya nejehebaponaewa paratixi xua painya necatsibinexa ichamonaetha. ⁴ Metha barapo Macedonia nacuamonaepiwi jiwana nebarũ ponaena poxonaе paca siwa ponaeinchi. Metha barapomonaе paca taetsipa xua jopa pana nacui yabara wũnaetsim xua painya nejehebaponaewa paratixi xua painya necatsibiwa ichamonaе. Bapoxonaе bichocono paauran tsipae tsipei bayatha paca yabara paebatsi xua paxam pacatame nawita. Irũ paxam paauran tsipae. ⁵ Nanta xeinan xua bewa copiya itorobin barapo acoibi poyobe xua bara poyobe copiya paca siwa ponaena beya poxonaе xua paca siwa ponaeinchi. Barapoxonaе barapoyobe painya nepaca yawenaenexa xua penotaponaewa paratixi. Bayatha pana nemuxu tsipaebame xua pinae paichichipame painya necatsibiwa ichamonaе barapo paratixi. Po paratixi panotaponame panacui yabara

wetsiname, baxua patsita itapeinya xeiname xua saya jopa apara poxoru bewa pacatsibim. Saya poxoru painya coutha painya neichichipaexae xua painya necatsibiwa.

⁶ Payabara nanta xeinare po diwesi ba xua jeye: Pon ba conotha Ɂba ba conotha jota pocotsiwan xua penawetsiwan. Pon ba jopa juniya Ɂbiyo ba jopa juniya jotsiyo pocotsiwan xua penawetsiwan. ⁷ Daxita pomonae pejume cowantsiwi bewa catsibeibina be pocotsi coyeneya nanta xeina pejanta coyenewatha. Jopa bewa asiwiya catsibeibi icha aichaxaibi xua pecatsibiwa. Matautano jopa bewa catsibeibi poxoru ichan pecui itorobixae xua pecatsibeibiwa tsane. Nacom tsita janta coyene xanepanatsi nawita pon janta coyene weiweinaya douteiba ichamonaetha. ⁸ Nacom bara itacupatsi xua daxita painya nepaca catsibiwa pocotsiwan panantawenoname, matautano ichawano xua bichocono nawita beyacaincha pocotsiwa xua panantawenoname. Bapoxonae paxeinaename pocotsi coyeneya xua paca cui jupa xua pajanta coyene weiweinaya catsibiname ichamonaetha. ⁹ Nacom Pejume Diwesitha pon nawita pecatsibin jiwi bapon yabara jeichichi, jeye:

“Pon catsibeiba poneiba nawita pomonaetha pomonae peacopeibi jiwi Nacom jopa juniya xuya catsibeibi tsane bapontha, xanepanaya peexanaexae”, jei Nacom Pejume Diwesitha.

¹⁰ Apra Nacom pon catsibeiba jiwi po pexu xua jiwi peubinexa. Matautano apra Nacom pon catsibeiba pexaewa xua jiwi pexaenexa. Barichi Nacom paca catsibeibina

beyacaincha xua pocotsiwa panantawenoname. Bapoxonae paca cui jupaena xua ichamonae painya necatsiba dubenanaebiyaewa tsane nawita, pocotsiwa jopa panantawenonaem.

¹¹ Nacom nawita paca catsibina xua daxota paca itacupaena xua ichamonae pacatsiname nawita. Poxonae pacaponaein barapo paratixi xua pata itorobame peacopeibi jiwi nexa, Jerusalén tomaratha, bapoxonae barapomonae Nacomtha jeye tsane: “Nacom maisa pajuntu coyene weiweinan xua painta exaname xua daxota barapo Corinto tomarapiwi painta itoroba paratixi”, jei tsane.

¹² Poxonae barapo paratixi pacatame barapo pejume cowantsi jiwitha, bara barapomonae pacatame pocotsiwa barapomonae penantawenonaewa. Matautano painya neexanaexae baxua barapomonae wunae jainteiba Nacom.

¹³ Barapomonae wunae jainta Nacom painya nejejeixae xua paexaname po coyene Cristo pia pecapanenebiyae diwesitha paca itoroba. Matautano barapomonae Nacom wunae jainchinchí, painya neyawenaexae poxonae pacatame paratixi nawita barapomon-aetha xuano xua daxita ichamonaetharu.

¹⁴ Barapomonae Nacomtha pacata wucaena pia paca necaantobewaxae poxoru barapomonae patsita itapeinya xeiname xua Nacom bichocono paca yawena pia paca necaantobewaxae.

¹⁵ Nacomtha patsipaeban, pajanje: “Nacom maisa pajuntu coyene weiweinan xua nexanto painta amanaya itorobicame pata xantha. Baxua pocotsiwa xua painta exaname bichocono jopa juniya xanepanaeyo xua jopa pana itacupaeyo

xua po jumetha pata yabara paebiwa”, pajan.

10

Meje xua Pablo yabara paeba pia peitorobi coyenewa

¹ Xan Pablon paca jume fayacotatsi. Paca tsipaebatsi icha be pocotsi coyeneya Cristo ichi poxonaе paeba. Bapon tsipaeba jiwitha pebar_u cui itura jinae coyenetha xuano peantobe coyeneyatha. Paxam pinae pana neyabara paebame pinae pajam: “Poxonaе Pablo popona pata xantha saya jopa jume daunweyo poxonaе pana netsipaeba. Ichitha poxonaе taj_u wepainta tineibarena jume daunweya painta tineibarena”, pinae pana neyabara jam. ² Poxonaе paca siwa ponaeinchi jopa paexanaeinde pocotsiwa xua daxota bewa paca tsipaebinchi pocotsi jumeintha xua daxota jume daunweya tapaca catsipaebiwa tsainchi. Ichamonae paxam jiwana pana neyabara paeba xua pinae abe paexanan poxonaе paexanan pocotsiwa Nacom pana itoroba icha pocotsi jiwimonae ichi pomonae jopa pejume cow_untsiwi. Bewa jume daunweya tsipaebin barapomonaetha xua baxua yabara xua taneyabara paebiwa. ³ Bara xaniwaicha xua paxan apara saya jiwi pan. Bequein paxan pajinompan barapo cae pin nacuathe, ichitha poxonaе pacuiduban Nacom Pejume Diwesi jopa paexanaeinyo icha barapo cae pin nacuathepiwi ichi poxonaeba yabara naba peexanaenexa pocotsiwa ichichipa. ⁴ Jopa paxeinaeinyo xua pesojeiwan xua pata nabinexa xua pocotsiwa barapo cae pin nacuathepiwi xeina. Daichitha

paxeinan Nacom pia peayapusu itorobi coyenewa tatsi xua baraxota pata nayaewatsinexa. Barapon Nacom pia peayapusu itorobi coyenewa tatsi pana necana exana xua paamanayaban po peayapusuwa barapo cae pin nacuathepiwi xeina xua saya caurimonae pia pentacaponaein tatsi pia peayapusuwa tatsi. ⁵ Ichamonae najume matsontsonoba poxona pacueicueijan Nacom Pejume Diwesi jopa peichichipaexae xua Nacom peyaputaewa tsainchi. Barapomonae pajume amanayaban poxona najume matsontsonoba. Barichi pomonae atsaquiya penayabara paebiwi pia coutha poxoru jopa ichipaeyo xua Nacom peyaputaewa tsainchi, barapomonae pacui amanayabundu. Paxan pacopatan xua bara Cristo pata tanecanamataxeinaewa daxita pata tananta xeinaewatha, xua daxota pata exanaewa pocotsiwa Cristo pana itoroba. ⁶ Paxan panacui wunaetan xua pata muxuwetsiwa pomonae jumefeba Nacom pomonae painyamona jiwana pamxaem. Baxua paexanaein barapomonaetha poxona paxam matha tsiwanaya xaniwaicha pajume jejam tsurubenanaebiyam tsane xua paexana dubenanaebiyame pocotsiwa Cristo ichichipa.

⁷ Paxam paca tsitatsi xua paxan be pomonae jopa peainya cui jiwi pan poxona saya pana taneme. Jopa pana nejuntu cui coyene yaputaem po coyene xua paxeinan pata juntu coyeneintha. Icha ichun xaniwaicha pia coutha nayabara nanta xeina xua bapon Cristo piamonae jiwana tatsi, bapon bewa barichi xua bewa pana yabara juntanainae xua paxan bara Cristo piamonae ji-

wana tatsi pan icha bapon ichi. ⁸ Jopa auranyo xua pata coutha pata nayabara paebiwa baxua bequein pata coutha atsaquiya pana nayabara paeban xua janje baxue: “Apara Nacom pana cata pia peayapus_u itorobi coyenewa xua pata paca cayawenaenexa tsainchi xua painya nejunt_u coyene xanepanaponaenexa. Apara jopa pana catsiyo barapo peayapus_u itorobi coyenewa xua pata paca abe exanaewatsi tsainchi”, xua jan. ⁹ Jopa ichipaeinyo xua pata taneyabara nanta xeinaewam xua pana pata tanejume cunuwiwam xua pacata tinatsi cartan. ¹⁰ Ichamonae neyabara paeba, jeye: “Pablo pia cartantha xua taj_u wenacata tineibarena bichocono ayapube xua wayabara jume cowantsiya exanaewa yawa bichocono jume daunwei tsaibi. Ichitha poxona bapon patopa waxantha pia pepon saya pecui pawu xuano poxona cueicueijei jopa naca tsita ainya cuiyiyo”, jei barapomona. ¹¹ Barapomona apara bara bewa pana neyaputaena xua paexanaein pocotsiwa xua cartantha papaeban poxona papatsin barapomona pia tomaratha tatsi.

¹² Pata coutha jopa pana nayabara nanta xeinaeinyo xua paxan pacui jupan xua pomona pia coutha penayabara nanta xeinaewi xua peainya cui jiwi naexana. Saya barapomona pia coutha nayabara nanta xeina xua bara betiya exana daxita, beyacaincha ichamonae pomonae piamona tatsi. Barapomona apara jopa peyaputae jiwi, poxoru saya jeita nawita xua po coyene beyacaincha piamona tatsi exana. ¹³ Paxan saya tsiwiyo atsaquiya yabara papaeban po coyene xua Nacom pata tanecui

copatsiwa xua bara pata tanacuichiwa Nacom. Jopa toxechiwa atsaquiya papaebinyo xua beyacaincha xua poxona Nacom pana copata xua pata exanaewa tsane. Saya paexanan po penacuichiwa xua Nacom pana cata. Nacom pana copata xua papatan ichaxota paxam Corinto tomaratha xua pata paca cayawenaenexatsi Nacom Pejume Diwesi. ¹⁴ Jopa patoxechiwa exanaeinyo po coyene Nacom pana itoroba poxona paca siwa poinchi. Paxan pomonae pan pomonae copiya papatan painya xantha xua pata paca catsipaebineatsi Cristo pia pexeinya jume diwesi. ¹⁵ Ichamonae pomonae paxam jiwana pam jume cowanta Cristo pejume diwesi pecuidubixaetsi ichamonae. Barapomonae pomonae pejume cowantsiwi Cristo pejume diwesi, jopa atsaquiya bepayabara janyo: “Barapomonae jume cowanta apara poxoru barapomonae pata cuidubixae”, jopa bepajanyo. Jame xua paichichipan xua paxam bewa mataropeichiya pajume cowanta dubenanaebiyaename. Bapoxona pana itacupa xua mataropeichiya pata nacuichiwa painya xantha. Saya meisa bewa paexanaein pocotsiwa Nacom pana itoroba. ¹⁶ Paichichipan pata cuidubiwa ichamonae Nacom Pejume Diwesi xua taja beya xua painya tomara weya poxona pawetan xua pata paca cuidubiwaetsi Nacom Pejume Diwesi. Ichitha jopa paichipaeinyo xua pata cuidubiwa Nacom Pejume Diwesi ichaxota ira ichamonae cuidubara barapo Nacom Pejume Diwesi yawano xua jiwi jume cowanta barapo diwesi. Tsipei barapo pejume cowantsiwi jopa

paichichipaeinyo xua pata yabara jeinexa: “Barapomonaе tаjу weya jume cowunta barapo Nacom Pejume Diwesi pata cueicueijeixae barapo diwesi”, jopa bepayabara janyo.

¹⁷ Icha ichun ichichipa atsaquiya penayabara paebiwa xua pinae beta exana, jame bara bewa moya bara atsaquiya yabara paebi po coyene Nacom pia peyaputae coyenewan tatsi yabara xua petsita itapeinya xeinaenexa xua apara Nacom beta peexanaein. ¹⁸ Pocotsiwa xua pebin pia coutha nayabara wunaе jainta xua beta pe-exanaexae baxua Nacom jopa tsita ainya cuichi. Pocotsiwa xua Nacom yabara nanta xeina xua barapo pebin yabara nanta xeinatsi baxua jame Nacom tsita ainya cuichi.

11

Meje xua Pablo yabara paeba pomonaе xua muxuitorobiya pejeiwa: “Paxan Jesús pia peitorobi jiwi tatsi pan”, pomonaе pejeiwa

¹ Ichichipan xua jopa painya neaitaconaewa xua tapanа nejume yabara ewatsiwam xua tapaebiwa pocotsi jume xua po diwesiyo xan yabara. ² Tsipei yaitama bichocono paca asiwatsi icha Nacom pana ichi xua pana asiwa. Paxan paca doutatsi Nacomtha xua painya nejume cowuntsinexa Cristo. Barapocotsi coyeneya paca cana exanatsi icha be pocotsi coyeneya pebin ichi poxonaе ba pexantiyo douta xua ichun pepichinexa powa bayatha ichun jopa pichiyo. Bapowa antobe pia pebin. Paxam bewa bara paichim, bewa Cristo pantobem. ³ Caurimonaе

pia pentacaponaein tatsi pon pia coutha naexana be jomo, bapon Eva muxuitorobatsi peajantucoyenebewatha. Pajunuwan xua bapon paca muxuitorobina barapo jantucoyenewatha. Bapon paca cana exanaena xua painya nenanta xeinaewa Cristo jopa beta peyabara nanta xeinaewatsi, xua equeicha jopa xanepanaya painya neantobewa tsane Cristo, meisa xua bapontha painya neantobenexa. ⁴ Paca yabara junuwatsi poxoru pajume naitaewatame pocotsi diwesin xua daxita jiwi paeba. Paxam itapeta pajume naitaewatame ichantha pontha pon peyabara paebin Jesús xua ichan xua pon pepa Jesús aibi. Paxam payabara jume naitaewatame icha jumope xua po jumope jopa xapain Nacom pia Pejumope tuxatatsi. Matautano yabara pajume naitaewatame icha diwesi po diwesi xua jopa xapain Nacom pia pecapanenebiyae diwesi jume xua po diwesi jume copiya pajume taneme. ⁵ Pomonae baxuan paca tsipaeba, barapomonae pia coutha nayabara nanta xeina, jeye: “Paxan Jesús pia peitorobi jiwi tatsi pan, xua pata peainya cui jiwi pan”, jei. Ichitha jopa yabara nanta xeinaeinyo xua barapomonae netoxeinha peainya cui jiwi beyacaincha xua xan. ⁶ Xan saya taepato cueicueijan Nacom Pejume Diwesi tatsi. Jopa bichocono wanae tacueicueijiwa jopa be bapocotsinyo be pocotsin xua beta pecueicueijiwa. Daichitha bara yaputan xua yabara tacueicueijiwa. Paca tsita itapeinya xeineibatsi xua bara tayaputaewa, xua poxona daxita pocotsiwantha paca tsipaebeibatsi.

⁷ ¿Metha bara abe exanan jampa poxona jopa

paca w_hcaetsi pocotsiwa nantawenonan xua tacueicueijeixae Nacom pia pecapanenebiyae diwesi? Jume apara, apara jopa abe exanaeinyo. Tacoutha acopeibi naexanan xua tacui paw naexanan xua saya meisa ainya cui paca cana exanatsi poxonae paca cuidubatsi Nacom Pejume Diwesi. ⁸ Ichamonae pomonae pejume cow_hntsiwi pomonae penacaetuteibi jiwi, xua pomonae w_hnae pejainteibiwi Nacom barapomonae wecobe pitan paratixi tanecatsixae. Barapo paratixitha comocan pocotsiwa xua nantawenonan poxonae tapaca bar_h ecaewatsi xua amanaya tapaca cayawenonaenexatsi. ⁹ Poxonae cataunxuae paca bar_h ecatsi bapoxonae inta acoibi pocotsiwa tacanantawenonaewa. Jopa w_hcaeinyo painyamonae jiton xua pocotsiwa daunweya pacata exainchi xua saya painya tana necatsibiwaxaem. Pomonae Macedonia nacuamonaepiwi pomonae pejume cow_hntsiwi barapomonae inta carendena pocotsiwa xua tacanantawenonaewa. Bayatha jopa paca w_hcaetsi xuano xua equeicha bexa jopa paca w_hcae tsainchi xua daxota jopa pacata daunwei exanae tsainchi xua daxita coyenewantha. ¹⁰ Taj_hnt_h coyenewatha xeinan Cristo pia pexainyei coyenewa tatsi. Dapon aibi xua neexana xua taitompa exanaewa xua yabara tacueicueijeiiwa baxua xua jopa paratixi paca w_hcaetsi. Baxua cueicueijan daxita Acaya nacuatha. ¹¹ ¿Eta xua metha baxua paca tsipaebatsi? ¿Metha poxoru jopa tapaca antobewatsi? Ajibi apara, Nacom yaputane xua

bichocono tapaca antobewatsi.

¹² Ichitha awiya exanaponaein pocotsiwa xua anoxuae exanaponan xua jopa tapaca w^ucaponaewatsi paratixi. Baxua exanan xua tajume cui matawentsinexa, pomonae xua naerabiya atsaquiya paeba, xua jeye: “Paxan j^upa paexanan icha Pablobar^u ichi xua paratixi nonotapona be pentoma xua pecueicueijeixae Cristo pejume diwesi”, jei. ¹³ Barapomonae pemuxuitorobi jiwi xua pinae barapomonae Jesús pia peitorobi jiwi tatsi. Barapomonae jiwi muxujainyaba pia penacuichiwa coyenewatha. Barapomonae be natsicotane Jesús pia peitorobi jume pepaebi jiwi tatsi. ¹⁴ Pocotsi coyeneya xua barapomonae nacana exana jopa yabara naj^unt^u coyene cabenaecaeinyo. Payaputan xua barapomonae apara Satanás piamonae tatsi tsipei barapomonae pia coutha nacana exana xua itara mexeya beta peexanaewi icha bapon ichi. Satanás pon caurimonae pia pentacaponaein tatsi pia coutha nacana exana xua itara mexeya pon xanepanaya peexanaein icha matatsunpin ichi xua pexeinya peit^upanae coicha xeina Nacom weya. ¹⁵ Daxota jopa bewa naj^unt^u coyene cabenaecaetsi xua poxonae Satanás pia petanacuichi jiwimonae tatsi exana icha Satanás ichi poxonae exana. Barapomonae natsicotane be pocotsimonae xua beta peexanaewi. Daxota poxonae Nacom yabara paebina barapomonae xua penatsicuentsiwa xua abe peexanaexae, barapomonae bichocono atene exanebinchi xua be pocotsi coyeneya bichocono abe peexanaexae.

*Meje xua poxonaē Pablo pia coya nayabara
paeba xua atene exanatsi Jesús pia peitorobi jiwi
jiwana tatsixae*

¹⁶ Equeicha paca tsipaebatsi: Jopa paneyabara nanta xeinaeinde xua xan be pon tanentajemabin bequein cueicueijeithan barapo coyeneya. Ichitha icha panecayabara nanta xeiname baxua bara saya beitatemaya amuxuya pana nejume taema pocotsiwa xua cueicueijan icha be pocotsin pon pematajemabinchi ichi. Bapoxonaē xan tacoutha atsaquiya conotha nayabara paebin icha ichamonaē ichi xua pia coutha atsaquiya nayabara paeba. ¹⁷ Apra jopa paebinyo xua tana itorobixae Jesús pon jiwi Pecanamataxeinaein. Apra saya tacoutha atsaquiya nayabara paeban icha pon matajemabatsi ichi xua pia coutha natsipaeba. ¹⁸ Tsipei ayei jiwi atsaquiya yabara paeba pocotsiwa barapo cae pin nacuathe xeina. Daxota xan barichin tacoutha atsaquiya nayabara paeban. ¹⁹ Pananta xeiname xua daxita pam painya neyaputae jiwi pam. Ichitha jopa peyaputaewi pam. Bara saya pacui yabara copatame xua pajume naitomatame pomonaetha pomonaē be pematajemabi jiwi pomonaē naerabiya paeba xua poxonaē jeye: “Paxan Jesús pia peitorobi jiwi pan”, jei. ²⁰ Matautano bara saya pacui yabara copatame xua bara amanaya painya netanacuichinexa tsane ichamonaē. Matautano saya pacui yabara copatame xua bara ichamonaē amanaya paratixi painya nepaca cobe wenoteibiwa xua saya barapomonaē nexa. Matautano saya pacui yabara copatame xua bara ichamonaē paca yabara muxuitoroba painyawan

xua painya nepacata notsiwa. Barichi bara saya pacui yabara copatame xua bara ichamonae painya nepaca aebiwa xua barapomonae ainya cui jiwi beyacaincha paxam. Matautano saya pacui yabara copatame xua bara painya nepaca itabara cuainchiwa. ²¹ ¡Bequein auran xua paca tsipaebatsi baxua, ichitha jopa padaunwan tsobenaeinyo icha paichim poxonae ichamonae pacata abe exana!

Icha daxita jiwi ichi xua atsaquiya nayabara paeba, xan barichin iru atsaquiya nayabara papaeban tacoutha icha pon pematajemabinchi ichi xua poxonae nayabara paeba. ²² Barapomonae atsaquiya nayabara paeba xua barapomonae pinae judiomonaepiwi. Xan iruru apara barichin judiomonaepin. Matautano pinae barapomonae Israel pon bayatha tupa pia pemomoxi susato jiwi tatsi. Xan apara iruru barichin barapon Israel pia pemomoxi susato jiwi jiwana tatsin. Matautano barapomonae atsaquiya nayabara paeba xua pinae Abraham pia pemomoxi susato jiwi tatsi. Xan apara iruru barichin Abraham pia pemomoxi susato jiwi jiwana tatsin. ²³ Matautano barapomonae atsaquiya nayabara paeba xua pinae Cristo pia petanacuichi jiwichi tatsi. Nama apara xan iruru barichin Cristo pia petanacuichin tatsin beyacaincha barapomonae. Poxonae baxua paeban apara icha pocotsin ichi pon pematajemabinchi xua pia coutha nayabara paeba. Xan bichocono daunweya ayapusaya nacuitan Cristo nexa beyacaincha barapomonae. Jiwi matowa nejebeiba jiwi

pecubi bontha beyacaincha barapomonaе. Ichamonaе bichocono nebeiba beyacaincha barapomonaе. Matowa muxu tatapeibi xua ichamonaе inta exana. ²⁴ Daxota cinco po coyenewathabe judiomonaе newaetaba pia tanecuainchinexa. Daxita coyenewatha necuainta barapomonaе treinta y nueve po cuiyobetha copabeiba xua nejuma cuainta xua xota cuainta xua duwein perа muto. ²⁵ Ichacuitha tsaibi acoibi po cuiyobetha necuainteiba iwatontha. Cae coyenewatha ibotontha necuinbabeiba. Acoibi po coyenewathabe jeratha ponaetha pin naetha payothopan poxonaе pawarapan xua jera bunareca. Cae merawitha yawa cae mataqueithano xoyopan pin mar mentha. ²⁶ Matowa warapeiban tacaponaenexa Cristo pejume diwesi xua jiwi tatsipaebinxе. Ichacuitha inta daunwei xua icha muxunene beya mene iya tapateibiwa tsane poxoru metha awabo tsipae. Ichacuitha inta daunwei poxonaе poneiban namtontha xua metha pomonaе pecaibi jiwi tawanaetha jinompeiba xua tanecaibiwa tsane pocotsiwa xeinan. Ichacuithano inta daunwei poxonaе tanacuamonaepiwi metha inta abe exaneibichipa. Ichacuitha inta daunwei poxonaе pomonaе jopa pejume cowantsiwi metha abe tana neexanaewa tsipae. Ichacuitha inta daunwei poxonaе jiwi tomarantha metha abe tana neexanaewa tsipae. Ichacuitha inta daunwei poxonaе ira xuepana susato tsurucuae nacuatha taponeibiwa xua metha abe tana neexanaewa tsipae. Ichacuitha inta daunwei

poxonae pin mene mar mentha metha abe tana neexanaewa tsipae poxonae jeratha ponan po nae pin naetha. Ichacuitha inta daunwei poxonae metha abe tana neexanaewa tsipae pomonae naerabiya pepaebiwi xua pinae pejume cowantsiwi. ²⁷ Xeinan penacuichiwa po penacuichiwa inta bichocono daunwei xua neatene exana. Matautano ainya merawin tsaibi xua jopa maiteibinyo. Matautano tain atenein tsaibi. Matautano bichocono tameratsi tsaibi. Matautano ainya matakabin inta pexaewa ajibi tsaibi. Matautano bichocono aquein tsaibi poxonae inta seiqueiba paparuwa.

²⁸ Matautano iru icha coyeneinno xua seica xua tapaca tsipaebi watsi. Matautano xeinan icha coyene po coyene xua neajuntu coyenerewe exana xua poxonae yabara nanta xeineiban pomonae Nacom pejume cowantsiwichi pomonae penacaetutsi bonmonaepiwi poxonae ne-eena xua tayawenaenexa barapomonae. ²⁹ Icha ichun pon barapo penacaetutsi bonmonae jiwanapin, icha bapon juntu cui coyene faefaena xua pejume cowantsiwa Nacom, nantanuweya yabara nanta xeinan bapon. Icha ichun juntu coyene jujutatsi xua abe peexanaenexa auran bapon nexa, yawano caseban pontha pon pejuntu coyene jujutsixae. ³⁰ Icha bewa atsaquiya nayabara paebin, bapoxonae atsaquiya yabara paebin pocotsiwa xua jiwi tsita itapeinya xeinan xua xan faefaenan xua jopa neitacupaeyo xua tacoutha tana nayawenaewa. ³¹ Nacom neyaputane xua xaniwaicha bara yabara paeban po coyenein xua inta daunwei. Nacom Jesucristo Paxa tatsi, pon

Wanacanamataxeinaein. Barapon jiwi bewa w_hnae jainteibina ataya. ³² Caena bayatha Damasco tomaratha poponan. Bapoxonae pon canamataxeina barapo tomaratha, bapon itoroba soldadomonae xua tomara peyacaincha toxorotsi dutsiwa coibototha peumenaenexa. Barapo soldadomonae tomara coibotontha umena xua pia tanewaetabichi poxonae tomara wewarapiyan xua tanecaponaenexa jiwi pec_ubi botha. Barapon pon canamataxeina barapo tomaratha bapon tanacuitatsi pon yatsicaewa nacua peewatsin bapon tanacuitatsi, pon pew_n Aretas. ³³ Bequein barapo soldadomonae bepa newaetabei, ichitha jopa ponaeinyo tomara coiboto iya. Ichamonae neyacote yoreca ventana wereca xua pepa tomara juma deca. Bara panepataban.

12

Meje xua Pablo yabara paeba xua petsita it_ubiwatsi xua abe poxonae camaita pocotsiwan Nacom tsita it_uteiba bapontha

¹ Bewa tacoutha atsaquiya paca tsita nayabara paebichi, xua painya neyaputaenexa xua bara beta taexanaewa. Daichitha jopa xapain neyawenaeyo baxua. Jame apara awiya paca tsipaebatsi xua pocotsiwan Nacom netsita it_uta xua be poxonae camaitan. Matautano paca tsipaebatsi pocotsiwan xua Nacom neyaputane exana xua bapon pia peyabaraxae. ²⁻³ Caena bayatha ainya wei xua poxonae copiya tajume cow_untsiwa Cristo. Caena bayatha catorce

po weibe yapucaewa xua poxonaecapona jemeicha peitaboco beicha po itaboco bichocono taj^u beicha ichaxota Nacom popona. Jopa taeinyo icha metha pepon daxita necaicha ichacui^utha saya metha moya nejumope caicha. Xan jopa baxua yaputa^ueinyo saya meisa compa Nacom yaputane. ⁴ Xan yaputan xua necaicha paraiso mataw^un nacua beicha. Poxonaecap^uatan barapo nacuatheicha jume tan baxoteicha po jume xua nameicha moya yaw^un xeina xua jiwi jopa yabara yaputaeyo. Nacom jopa yabara necopatsiyo xua bara barapo jume tatsipaebiwa tsane ichamonaetha. ⁵ Bequein neitac^upa xua atsaquiya tayabara paebiwa xua pocotsiwan w^unae xua xuan tataexae, daichitha jopa barapo coyeneya exanaeinyo. Saya meisa atsaquiya yabara paeban pocotsiwan xua inta ayapube xua po coyene tatsita itapeinya xeinaewa xua apara nefaefaena exana xua daichitha Nacom neyawena. ⁶ Bara neyabara cui copata xua bara atsaquiya tanayabara paebiwan tsane pocotsiwan xua beta taexanaewan. Poxonaecap^uatan baxua exanan jopa paebinyo icha be pocotsin pematajemabinchi ichi, xua nayabara paeba tsipei paeban pocotsiwan xua pexainyeiwan. Ichitha xan jopa baxua atsaquiya nayabara cui paebinyo, tsipei jopa ichipaeinyo xua ichamonaecap^uatan taneyabara nanta xeinaewa xua xan bichocono taainya cuin, beyacaincha xua pocotsiwa barapomonaecap^uatan necui tane xua exanan, xuano xua beyacaincha nejume tane xua cueicueijan. ⁷ Pocotsiwa xua Nacom neyaputane exana bichocono w^unae

nawita. Nacom copata xua bara saya atenein tsaibi tsane xua atsaquiya tapaebiyainwa pocotsiwan xua Nacom yabara neyaputane exana. Barapo peatene coyenewa caurimonae pia pentacaponaein tatsi, pon Satanás, itoroba xantha xua atene tana necana exanaenexa. Barapo peatenewa bichocono atenein tsaibi be poxona xua xane eto nexatempa. ⁸ Acoibi po jumeyothabe tsaibi Nacom jume fayacotsiya w_uqueiban xua taneperaxa capanepaenexa barapo peatene coyenewa weya. ⁹ Ichitha Nacom netsipaeba, jeye: “Jume, jopa caaxaibi exanaetsi. Jame cata itorobatsi Tajumope t_unax_u jinya necayawenaenexa daxita tacaantobetsixaetsi. Saya meisa baxua nantawenoname. Po jiton ba axaibiya popona bara itac_upatsi xua daxita pia coutha peexanaewa. Jopa ba canantawenonaeyo taayapus_u coyenewa. Ichitha nama pon ba taayapubetsi xua pia coutha beta peexanaewa bapon jame canantawenona taayapus_u coyenewa. Bara bapon yawenan”, jei Nacom. Daxota ichichipan poxona inta ayapube tsaibi xua jopa tana neitac_upaewa xua daxita beta taexanaewa tacoutha. Bapoxona j_iwi tanetaenexa xua bara Cristo neyawena pia peayapus_u coyenewatha. ¹⁰ Daxota j_unt_u coyene weiweinan poxona inta ayapube tsaibi xua beta taexanaewa. Mata_utano j_unt_u coyene weiweinan poxona j_iwi abe neyabara paebeiba. Mata_utano j_unt_u coyene weiweinan bequein jopa xeinaeinyo pocotsiwa xua tanantawenonaewa. Barichino j_unt_u coyene weiweinan poxona bequein j_iwi neatene exaneiba tajume cow_untsixae

Cristo. Matautano juntu coyene weiweinan poxonae bequein jiwi inta ayapube exaneiba. Daxita baxuan nejuntu coyene weiweina exana, poxonae inta ayapube tsaibi xua beta taexanaewa xua ichamonae inta daunwei peexanaexae. Bapoxonae bara xaniwaicha asun tsipei Cristo tana neyawenaexae.

Meje poxonae Pablo yabara najuntu coyene eena exana nawita Corinto tomarapiwi

¹¹ Cueicueijan icha ichi poxonae cueicueijei pon pematajemabinchi xua atsaquiya nayabara paeba. Ichitha paxam pana necana exaname xua atsaquiya tanayabara cueicueijeiwa. Jame apara paxam barapomonae pam pomonae bequein bewa xanepanaya pana neyabara paebim. Bequein xan jopa peainya cuiyinyo, ichitha barapomonae jopa peainya cui jiwi beyacaincha xua xan pomonae pajume naitaewatame. Barapomonae naerabiya paeba xua pinae barapomonae bichocono peainya cui jiwi pomonae Cristo pia peitorobi jiwi jiwana tatsi. Ichitha barapomonae xainwaicha bichocono jopa peainya cui jiwi. ¹² Poxonae cataunxuae paca baru popoinchi paca tsita itapeinya xeinatsi xua xan yatsicaya Jesucristo pia peitorobi jiwi jiwana tatsin. Matautano jopa aitaconaeyiya exanaeinyo poxonae bequein ichamonae inta daunwei exana poxonae abe neyabara paeba. Jame saya juntea exana ducunaebiyan petsita itutsi coyenewan painya xantha bequein ichamonae abe neyabara paeba. Matautano exana ducunaebiyan pocotsiwan jiwi nabenaeca exainchi. Daxita bax-

uan exanan Nacom pia peayapusu itorobi coye-
newatha tatsi. ¹³ Paca yabara nanta xeinatsi xua
paxam metha pananta xeiname xua paxam jopa
peainya cui jiwi pam. Matautano metha pananta
xeiname xua meisa icha penacaetutsi bonmonae
jiwi pomonae wunae pejume cowantsiwi Na-
com bichocono peainya cui jiwi beyacaincha
paxam. Metha pananta xeiname baxua poxoru
jopa paca wucaetsi xua tapana neyawenaenexam
tsane pocotsiwatha tanantawenonaewa pocotsi-
watha xua ayapube pacata exainchi.

¹⁴ Anoxuae nacui yabara wunaetan xua tapaca
siwa ponaewatsi tsainchi equeicha xua nama
acoibi po cuiyobetha tsane. Caena bayatha
copiya nacueyatabe po cuiyobetha paca siwa
poinchi. Ichitha jopa paca wucaetsi xua pocotsi-
watha tapana neyawenaenexam tsane xua pacata
ayapube exainchi. Ichitha jopa paca yabara
siwa ponaetsi taichichipaexae pocotsiwa xua pax-
einame. Apra saya paxam cuita paca siwa
poinchi. Pexui ba jopa nantawenonaeyo xua pax-
eiwi jantana jeba paratixi, jame saya ba coxiyeiwi
bewa pia pexui jantana jebi paratixi. Barapoc-
otsi jata coyeneya ichin bewa paca yawenaeinchi.
Jopa panantawenonaem xua tapana neyawenon-
aewam. ¹⁵ Juntu coyene weiweinan xua paca
catsinchi daxita xua xeinan. Barichi copatan xua
bara ichamonae atene tana neexanaewa tapaca
cayawenaenexatsi. Poxonae bequein matowa
toxeinchiya paca antobe tsozonaetsi daichitha be
conotha xuya pana neantobem.

¹⁶ Ichamonae pomonae painyamonaе jiwana
pam naerabiya neyabara jei: “Bara xaniwaicha

Pablo jopa painta ayapube exanaeyo xua pana newuca paratixi bapon nexa. Daichitha ichacuitha tsipae metha apara bapon naca muxuitorobiya wecobe notsipa paratixi”, jei. ¹⁷ ¿Metha paratixi paca yabara muxuitorobiya wecobe notsinchi poxona pebiwi itorobin painya xantha? ¡Jume apara! ¡Jopa baxua exanaeyo! ¹⁸ Tito itoroban xua painya nepaca siwa ponaewa tsane, irano ichanno itoroban pon ira pejume cowantsin xua Tito pecueiyatsiwa tsainchi. ¿Metha Tito bara paca yabara muxuitorobiya wecobe notsina paratixi? ¡Jume apara! Paxam bara payaputaneme bara Tito betiya xaniwaicha pananta jupaya paexananbe, xano pana najanta coyene japanbe.

¹⁹ Jopa payabara nanta xeinaeinde barapo jumein xua pata paca catsipaebi watsi xua saya poxoru pata ichichipaexae xua paxam paca tsita xanepanatsi. Jopa baxua paexanaeyo. Jame po jume xua Cristo ichichipa xua patapaebiwa, apara barapo jume cui coyeneya papaeban. Daxita baxuan pacueicueijan Nacom peitatha xua xanepanaya mataropeicha beta Nacom painya nejume cocowantaponaewa tsane. Baxua paexanan tsipei paxam tamona pam, pomona pata paca caantobe jiwichi pam. ²⁰ Junuwan xua poxona tapaca siwa ponaewa tsainchi xua metha pajinompatsipame be pocotsimonae aichaxaibin tataewa poxoru metha aichaxaibin tsipae pocotsiwa xua paexaname. Matautano metha paneyabara nanta xeinaetsipame xua xan jopa paca cui jupaetsi xua poxona pocotsiwa exanan. Barichi junuwanno xua poxona tapaca

siwa ponaewa tsainchi xua metha nantiya pana najume matsontsonobame. Matautano junuwan xua nantiya pana yabara uwame pocotsiwan paxeiname, xuano xua nantiya pana nacasebame. Matautano junuwan xua nantiya pana naasiwam xua ichamonae jopa bepayawenaem. Matautano junuwan xua nantiya pana nabiaetsipame xuano xua nantiya tsam̃ jumeya pana nacui yopitsipame pocotsiwan xua paexaname. Junuwanno xua nantiya pana naebichipame painya neyaputaexae pocotsiwan xua paexaname, xuano xua nantiya pana natsaquibabame poxoru painya neanaepanaexae. ²¹ Matautano junuwan xua poxonae equeicha tapaca siwa ponaewatsi tsainchi, Tanacom neexana xua paca yabara auratsi. Bichocono anthuthu wecoyan tsane pomonae nexa pomonae xua caena bayatha abe peexanaexae. Barapomonae cataunxuae jopa acuiuriyo pocotsiwan xua abe eexanapona xua poxonae barapomonae yabuxi nata nota xua bequein jopa piseurixi xuano poxonae yabuxi nata pebiwi poxonae jopa piseuriyo. Matautano barapomonae atsaquiya abe eexanapona.

13

Meje poxonae Pablo napeyabiya najume weta

¹ Anoxuae equeicha paca siwa ponaeinchi xua nama acoibi po cuiyobetha tsane xua taponaeewa tsane bara beya. Icha ichun ichichipa cui yopita xua ichun abe peexanaexae Nacom pia peitorobi coyenewa baxua yabara naca tsipaeba, naca jeye: “Poxonae jiwi cui

yopita xua ichun abe peexanaexae bewa acoibi poyobe yabara paebina bapontha, xua abe peexanaexae bapon. Ichacuiha saya nacueyatabe poyobebe yabara paebichipa bapontha bapoxonae jiwi tsita itapeinya xeinatsi xua bara bapon abe peexanaein”, jei Nacom pia peitorobi coyenewatha tatsi.

² Bayatha poxonae paca siwa poinchi yabara paca tsipaebatsi pomonae xua abe peexanaewi pomonae painyamonae jiwana pam xua iru ichamonae. Anoxuae bequein cataunxuae taju paca cuenta poponatsi, equeicha paca tsipaebatsi xua bayatha pocotsiwa paca muxuwetatsi, janje: “Poxonae equeicha paca siwa ponaeinchi ayapube taexanaein pomonaetha pomonae xua awiya abe peexanaponaewi”, jan. ³ Baxua paca cana exanaeinchi yaitama paichichipame xua paca tsita itapeinya xeinaeinchi xua pocotsiwa Cristo neitoroba tacueicueijeinexa bapon nexa. Paca muxuwetsinchi Cristo nexa tapaebixae bapon nexa. Cristo jopa jume faefaenaeyo poxonae yabara paca muxuwetatsi painya abe exanae cuiru coyenein. Jame apara bapon jume daunweya paca tsipaeba.

⁴ Poxonae Jesucristo tupa naetotha jiwi yabara nanta xeina xua bapon Cristo saya juntu coyene faefaena, tsipei jopa pia coutha nayawenaeyo. Ichitha anoxuae Jesucristo asu popona Nacom pia peayapusu itorobi coyenewatha tatsi. Bequein pajuntu coyene faefaenan anoxuae, daichitha poxonae paca itawetinchi bapoxonae jopa pajuntu coyene faefaenaein tsane. Jame asu pajinompaein. Bapoxonae Nacom pia peayapusu

itorobi coyenewatha ayapusu^uya paca itawetsina.

⁵ Incane painya coutha pana najuntu^u coyenein jujure icha bara xaniwaicha metha beta pajume cowantsiya jinompame. Icha bara xaniwaicha pana nayaputaneme xua bara yatsicaewa Jesucristo piamonae tatsi pam, barapoxonae pana nayaputaeneme xua bara aparta Jesucristo paca bar^u jinompa. Icha jopa Jesucristo piamonae tatsi pam, bapoxonae Jesucristo jopa paca bar^u jinompaeyo. ⁶ Ichichipan xua paxam

payaputaneme xua paxan Cristo pana bar^u popona. Paxan jopa pemuxuitorobi jiwi pan xua poxonae pata jeiwa: “Paxan Jesucristo pia peitorobi jiwi tatsi pan”, poxonae pata jeiwa. ⁷ Pawucan Nacomtha xua jopa abe

painya neexanaewa tsane. Jopa Nacomtha baxua payabara wucaeyino xua paca tsita itapeinya xeinaeinchi xua paxan Jesucristo pia peitorobi jiwi tatsi pan xua daxota beta painya neexanaewa tsane. Ichitha pacata wucatsi Nacom xua awiya u meisa pexeinya coyene painya neexanaponaewa tsane bequein metha pana neyabara nanta xeiname xua paxan jopa pomonae Jesucristo pia peitorobi jiwi tatsi panyo. Bequein paxan jopa paca tsita itapeinya xeinaetsi xua bara Cristo pia peitorobi jiwi tatsi pan. ⁸ Paxan jopa paichichipaeinyo xua pata

yabara jume toxeinchiya exanaewa pocotsiwa itoroba barapo Nacom pia pexainyei diwesi jume. Jame aparta itapeta paexanan pocotsiwa itoroba barapo pexainyei jume diwesitha.

⁹ Daxota pajuntu^u coyene weiweinan poxonae ichamonae pana neyabara paeba xua pinae jopa

daunweya papaebinyo. Saya paichichipan xua beta painya nejume cowuntsiwa tsane. Awiya Nacomtha pacata wucatsi xua paxam xaniwaicha painya nejuntu coyene xanepanaponaewa tsane Nacomtha xua jopa patsita natsicuentisim tsane abe painya neexanaexae bapontha. ¹⁰ Pewunaeya xua poxona tapaca siwa ponaewa tsainchi, matha barapo carte pacata tinatsi. Daxota tinan xua jopa bewa paca tsipaebi tsainchi pocotsiwa pacata ayapube exanatsi poxona paca siwa ponaeinchi. Bapoxona jopa nantawenonaein tsane xua tapaca itorobiwa tsainchi xua taxeinaexae Nacom pia peitorobi coyenewa tatsi po peitorobi coyenewa Nacom necata. Nacom necata barapo peitorobi coyenewa xua painya nejuntu coyene xanepana ponaenexa Nacomtha. Apra jopa baxua necatsiyo xua abe tapaca exanaenexatsi.

¹¹ Tamona pam, bara wetan anoxuae barapo carte. Ichichipan xua painya nejuntu coyene weiweinaya jinompaewam tsane. Itapeta pajume jejande pocotsiwa xua paca muxuwetatsi xua daxota beta mataropeicha painya neexanaponaewa tsane. Pana najuntu coyene tsacabare xua daxota peburaya caemonae pana nabaru nanta xeinaeya jinompare. Juntama panabaru jinompare. Bapoxona Nacom pon Junta pepoponaein, xuano xua peantobe tsurucuaebiyaein, barapon paca baru poponeibina. ¹² Betiya painta nantiya najacobare painya neantobewaxae Cristo. ¹³ Daxita pomona xote jinompe pomona pejume cowuntsiwi Jesucristo barapomona paca jacobae.

14 Barabꝰ Jesucristo pon jiwi Pecanamatax-einaein paca yawenaena pia paca necaantobexae. Barabꝰ Nacom pia peantobe coyenewatha tatsi pajinompaename. Mataꝰtano barabꝰ Nacom pia Pejumoꝰe tꝰnaxꝰ tatsi daxita pam paca barꝰ ji-nompaena.

Baja Pablo.

**Nacom Pejume Diwesi po diwesi pena jume
diwesi xua Jesucristo yabara tinatsi
New Testament in Cuiba**

copyright © 2010 Wycliffe Bible Translators, Inc.

Language: Cuiba

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cuiba

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files
dated 29 Jan 2022

e9c4c3a0-6dec-54a4-aaba-fb395e5eddc7